

100 китоб тўплами

ТУЯҚУШЛАРНИ ПАРВАРИШЛАШ

88-китоб



**Қишлоқ хўжалигини илмий асосда йўлга қўймас
эканмиз, соҳада ривожланиш бўлмайди.**

Ш. МИРЗИЁЕВ.

Ҳурматли деҳқонлар, чорвадорлар, тадбиркорлар!

Жаҳон миқёсида аҳолининг озиқ-овқат хавфсизлигини таъминлашда аграр соҳанинг ўрни ва аҳамияти кундан-кунга ошиб бормоқда. Жумладан, мамлакатимизда ҳам мавжуд ресурс ва имкониятлардан оқилона фойдаланиб, аҳолини қишлоқ хўжалик маҳсулотлари билан кафолатли таъминлаш, ҳосилдорлик ва манфаатдорликни янада ошириш, соҳага илм-фан ютуқлари ҳамда замонавий ёндашувларни жорий этиш долзарб масаладир.

Муҳтарам Президентимиз Шавкат Мирзиёев 2020 йил 29 декабрь куни Олий Мажлисга йўллаган Мурожаатномасида, камбағалликни қисқартириш ва қишлоқ аҳолиси даромадларини кўпайтиришда энг тез натижа берадиган омил бу – қишлоқ хўжалигида ҳосилдорлик ва самарадорликни кескин ошириш эканлигини алоҳида таъкидлаб ўтдилар.

Бу жараёнда ҳар гектар ердан олинадиган даромадни ҳозирги ўртача 2 минг доллардан камида 5 минг долларгача етказиш устувор вазифа қилиб қўйилди ва қишлоқ хўжалигига энг илғор технологиялар, сувни тежайдиган ва биотехнологияларни, уруғчилик, илм-фан ва инновациялар соҳасидаги ютуқларни кенг жорий этишимиз лозимлиги белгилаб берилди.

“Агробанк” АТБ мамлакатимизда қишлоқ хўжалиги соҳасининг барқарор ривожланишига ҳисса қўшиш учун нафақат молиявий, балки ижтимоий лойиҳалар билан ҳам аграр соҳага сармоя киритишга эътибор қаратмоқда.

Жумладан, ривожланган давлатлар қишлоқ хўжалигида эришилган ютуқлар ҳамда тажрибалар асосида соҳанинг етук мутахассислари, олимлари билан ҳамкорликда фермерлар ва аҳоли учун дастлабки босқичда ушбу 100 та китобдан иборат қўлланмалар тўплами тайёрланди.

Тўпламда қишлоқ хўжалиги соҳаси, жумладан, мева-сабзавот ва полиз экинларини асосий ҳамда такрорий экиш муддатида етиштириш, иссиқхоналарда маҳсулот ишлаб чиқариш, ғаллачилик, дон ва дуккакли экинлар, чорвачилик, балиқчилик, асаларичилик каби тармоқларнинг энг илғор тажрибаларига оид кенг қамровли илмий ва амалий маълумотлар берилган.

Ушбу лойиҳани келажакда тажрибали деҳқон ва фермерларимиз, чорвадор ва ветеринарларимиз, аграр соҳа вакиллари ва бошқа китобхонларимиз фикр-мулоҳазалари ҳамда таклифлари асосида янада такомиллаштирамиз.

Умид қиламизки, ушбу қўлланмалар тўплами Сиз – деҳқонлар, чорвадорлар ва тадбиркорларимиз учун фойдали бўлади.

Ҳосилингиз мўл-кўл, даромадингиз баракали бўлсин!

**Рустам МАМАТҚУЛОВ,
“Агробанк” АТБ бошқарув раиси.**

УЎК 63:568.221

КБК 46.8

Т 94

Лойиҳа ғояси муаллифи ва ташкилотчи: “Агробанк” АТБ

Тузувчилар:

А.Х. Холматов – Чорвачилик ва паррандачилик илмий-тадқиқот институти “Иммуногенетика” лабораторияси мудир, қишлоқ хўжалик фанлари номзоди.

Тақризчилар:

Р.И. Рўзиев – Чорвачилик ва паррандачилик илмий-тадқиқот институти, катта илмий ходими.

О.А. Мамадиев – Тошкент давлат аграр университети, Умумий зоотехника кафедраси катта ўқитувчиси.

С.И. Мавланов – Ветеринария фанлари доктори.

Лойиҳа иштирокчилари: У.Ф. Файзуллаев, М.С. Ҳайитбоев.

Муҳаррир: Т. Долиев – “Ўзбекистон қишлоқ хўжалиги” журнали бош муҳаррири.

Ушбу қўлланма “Агробанк” АТБ муассислигида тайёрланди ҳамда нашр эттирилди. Билдирилган фикр-мулоҳаза, хулоса ва тавсияларга тузувчи муаллифлар масъулдир.

Ижтимоий лойиҳалар билан аграр соҳага сармоя киритиш доира-сида “Агробанк” АТБ томонидан 100 та китобдан иборат қўлланмалар тўплами тайёрланди. Тўпланда қишлоқ хўжалиги соҳаси, жумладан, мева-сабзавот ва полиз экинлари, ғаллачилик, чорвачилик, балиқчилик, асаларичилик каби тармоқларнинг энг илғор тажрибаларига оид ривожланган давлатлар ва юртимизда эришилган кенг қамровли илмий ва амалий маълумотлар қамраб олинган.

Тўплам мазкур йўналишдаги биринчи нашр бўлиб, келгусида ушбу лойиҳани давом эттириш мақсадида билдирилган фикр-мулоҳазалар ва таклифлар асосида янада бойитиб бориш кўзда тутилган.

Қўлланма соҳа мутахассислари, фермерлар ва кенг жамоатчилик учун мўлжалланган.

Ушбу қўлланма “Агробанк” АТБ туҳфасидир

© “Агробанк” АТБ – 2021

© Нашриёт уйи “Тасвир” – 2021

© “Colorpack” МЧЖ – 2021

ISBN 978-9943-7174-4-2

МУНДАРИЖА

Кириш	7
Туяқушнинг ташқи кўриниши	9
Туяқуш турлари.....	12
Туяқушчилик тарихи	13
Туяқушларни боқишда иқлим шароитининг таъсири	15
Туяқуш боқиш усуллари	15
Туяқушларни сотиб олиш.....	17
Туяқушчилик фермасини ташкил этиш	18
Туяқушларни парваришlash учун паррандахоналар	20
Туяқушлар учун сайр майдони	21
Туяқушларни парваришlashнинг ўзига хос хусусиятлари	23
Туяқушларни озиклантириш	26
Туяқуш жўжаларини озиклантириш	34
Туяқуш патларини йиғиш	38
Туяқушларни кўпайтириш	41
Туяқушлар тухумини териш ва сақлаш	45
Инкубатор тузилиши	49
Инкубатор параметрлари	51

Туяқуш жўжаларининг дунёга келиши	54
Инкубация жараёнидаги носозликлар	56
Овоскопия қилиш	57
Туяқуш жўжаларини парваришlash	59
Туяқушлар касалликлари.....	61
Туяқуш гўшти	70
Туяқуш териси	77
Туяқуш патлари	73
Туяқушчилик маҳсулотлари	75
Фойдаланилган адабиётлар рўйхати.....	76

■ | КИРИШ

Фермер хўжалигини юритишда туяқушчилик сердаромад ва истиқболли йўналиш ҳисобланади. Туяқуш маҳсулотларининг сифати барча қишлоқ хўжалик парранда маҳсулотларидан бир неча баробар юқори туради. Ҳар бир туяқуш сўйилганда 1 центнергача (100 кг) холестерини жуда кам миқдорда бўлган тансиқ (деликатес) гўшт, 2 кг атрофида қимматбаҳо патлар ва 2 м² енгил саноатда катта талабга эга бўлган сифатли тери беради.

Туяқушчиликни сердаромадлиги шундаки, агар фермада қорамолчиликни ривожлантирадиган бўлсак, ҳар бир бош сигирдан бир йилда бир бош бузоқ олиш мумкин. Сигирни уруғлантириб, ундан фойда олгунга қадар 2-3 йилга яқин вақт ўтади, чунки бузоқни сўйишдан олдин маълум тирик вазнга эга бўлиши учун бўрдоқига боқилиши керак бўлади. Бузоқ сўйиш кондициясига етиш учун тирик вазни 250 кг ни ташкил этиши керак. Шунингдек, ундан олинадиган тахминан 2,5 м² терини ҳам ҳисобга олиш лозим.

Агар сигир ўрнида 1 бош урғочи туяқуш боқилса, ундан йил давомида 40 бошдан кам бўлмаган ёш туяқушларни олиш, кўпайтириш ва ўстириш мумкин, агар йил давомида кўпайиши учун яхши шароитлар яратилса, ёш туяқушлар янада кўп ҳам бўлиши мумкин, айрим ҳолларда 2 баробар (1 йилда 80 бошгача) кўпайиш имкони бўлади. Туяқуш тухумининг инкубация даври 42 кунни ташкил қилади. Туяқуш жўжалари бўрдоқига боқилганда, катта ёшдаги она туяқушнинг вазнига 1 йилда етиб олади.

Жами 1 бош урғочи туяқушдан самарали фойдаланиб, ҳар йили 2 тонна атрофида қимматли парҳез гўшти, 50 м² атрофида юқори сифатли қимматбаҳо тери ва 36 кг сифатли патлар олиш мумкин.

Туяқуш 40 йил давомида кўпайиш хусусиятини йўқотмаслигини инобатга олсак, бу давр ичида 1 бош урғочи туяқушдан қолдирилган насли билан ҳисоблаганда 70 тонна парҳез гўшти, 2 минг м² тери ва тахминан 1,5 минг кг туяқуш патларини олиш мумкин.

Туяқушчилик бошқа барча чорвачилик тармоқларидан афзал ҳисобланиб, боқиш учун кетган сарф-харажатлар фақат (!) теринигина сотишдан тушган даромад ҳисобига қопланиб кетади, қолган бошқа маҳсулотлари соф фойда ҳисобланади.

■ | ТУЯҚУШНИНГ ТАШҚИ КЎРИНИШИ



Туяқушлар “camelus” деб бекорга номланмаган, чунки лотин тилидаги ушбу сўз “туя” деган маънони билдиради. Ҳақиқатда ҳам бу учмайдиган қушлар бўйни узун, дароз туяларни эслатади. Ташқи кўриниши замонавий қушлардан фарқли ўлароқ улкан гавдаси, узун бўйни, бўртиб чиққан кўзлари, майин узун киприклар билан ҳошияланган кўзлари афтига дўлвар (содда)

ва ҳайратланаётган қиёфа кўринишини беради. Туяқушлар ҳам туяларга ўхшаб чўлу саҳроларда ҳаёт кечиради ва уларга ўхшаб бепоён ҳосилсиз ерларда озуқа қидириб катта масофаларни босиб ўтишга қодир.

Етук ёшдаги қушлар баландлиги 230-270 см гача етади. Шу билан бирга эркагининг тирик вазни 150-175 кг гача, урғочилариники озгина енгилроқ – 120-130 кг гача бўлади. Тузилиши деярли юмалоқ, кесимида диаметри 5 см бўлган кўзи, танасига нисбатан унчалик катта бўлмаган бошининг учдан бир қисмини эгаллайди. Кўз соққасини чангдан асрайдиган учинчи қовоғидан ташқари, яна қалин пат парлари билан қопланган ва узун киприкларни эслатувчи юқори ва пастки кўз қовоқлари билан таъминланган.

Бошининг икки ёнида олдинга йўналтирилган катта кўзлари ва узун букилувчан бўйни мавжудлиги сабаблиги ўз вақтида яқинлашаётган хавфнинг олдини олиш учун атрофни кўздан кечириб туриш муаммо туғдирмайди. Туяқушлар кўзининг ўткирлиги анча узоқдаги объектни аниқ кўриш имконини беради. Уларнинг ушбу хислатларидан атрофларида ўтлаб юрган бошқа ҳайвонлар ҳам фойдаланишади, қайсики, хавф туғилса, ҳайвонлар ҳам олдиндан хабардор бўладилар. Бошининг юқори қисми текис ва пат-парлардан ҳоли (тақир). Қулоқлари тешик кўринишида, ёпиладиган клапанлари мавжуд ва бошининг орқа қисмида жойлашган. Бурун коваги тумшуғининг устида жойлашган, устини табиий озуқани ва сувни топишга ёрдам берадиган сезги мембраналар ёпиб туради.

Туяқушнинг бўйни жуда узун ва ингичка, у кўкрак суягига бириккан ва пластинка шаклидаги 19 та бўйин умуртқасидан иборат. Кенг ясси кўкрак суяги ички органларини турли зарбалардан сақлайди. Туяқушлар килсиз қушлар туркумига кириши сабабли, уларда киль (кўкрак суяги) бўлмайди.



Туяқушнинг оёқлари ҳам бўйнига ўхшаб узун ва ингичка бўлади. Оёқ мушаклари болдир ва сон суякларига бириктирилган. Сон ва болдирлари пат-парлар билан қопланмаган, тери қопламаси мавжуд холос. Бармоқлари бақувват ва парда билан

таъминланганлиги учун улкан гавдасини бемалол ушлаб туради.

Африка туяқуши ҳар бир оёғида бир жуфт бармоқлари бор, Эму зотида учта, Нанду зотида эса – тўртта. Фақат туяқушда барча қанотлилар орасида эволюция учинчи ва тўртинчи бармоқларини қолдирган. Тўртинчи бармоқнинг яхши ривожланганини алоҳида таъкидлаш жоиз, тагидан таранг катта қадоғи мавжуд бўлиб, устида бақувват етти сантиметрлик тирноғи бор. Учинчи бармоғи тўртинчисидан ўлчами бўйича анча фарқланади ва фақат мувозанатни сақлаб туриш учун хизмат қилади. Бармоқлари орасида таранг парда мавжуд.

Туяқушлар кафтининг шундай тузилиши туфайли бир лаҳзада бурилиши ва жуда тез ҳаракатлана олиши мумкин. Лекин, югуришда жуда яхши ривожланган оёқ, тос, думғаза ва бел мушаклари ҳам анча аҳамиятга эга. Туяқушлар – аъло даражадаги югурувчилар. Парранданинг узун кучли



оёқлари бир қадамида 8 метр масофани ўтиш ва тезликни 80 км/соатгача ошириш имконига эга. Албатта туяқушлар ҳар доим ҳам югуриб ҳаракатланмайди. Одатда улар 3 км/соатгача тезликда ҳаракатланадилар. Қанотлари жуда кичкина, аммо чиройлиги бўйича ажойиб, кишини ҳайрон қолдирадиган қалин патлар билан қопланган. Лекин, шундай кичкина қанотларидан ҳам мувозанатни ушлаш ёки ҳимояланишда фойдаланиши мумкин. Бундан ташқари, эркак туяқушлар урчиш мавсумида никоҳ ўйинида чиройли қанотларини намоиш этиб, кўз-кўз қилади ва танлаган урғочисини уя қуришига қанотларидан фойдаланиб ёрдам беради.

■ | ТУЯҚУШ ТУРЛАРИ

Зоология систематикаси бўйича туяқушлар югурувчилар кенжа отрядига киради, яна яссиқўкраклилар ёки килсизлилар деб ҳам аталади. Туяқушсимонлар отрядининг ёлғиз турига – африка туякуши киради.

Африка туякуши

Африка туякуши (*лот. Struthio camelus*) – учмайдиган қуш ва туяқушлилар оиласининг бирдан бир вакили. Лотин тилидаги илмий номининг таржимаси “чумчуқ-туя” номини англатади.

Африка туякушининг 3 тури – қора, пушти ва ҳаво ранглари кўп тарқалган. Қора рангдаги туяқушлар мали туяқушларини Жанубий Африка туяқушлари билан чатиштириш орқали келиб чиққан. Туяқушнинг бу турини кўпайтириш бизнинг шароитга кўпроқ тўғри келади. Қўлга тез ва осон ўрганади.



Нанду

Нандусимонлар отряди нанду наслига киради, улар Жанубий Америкада учрайди. У икки турга – шимол нандуси ва узун тумшукли ёки дарвин нандуларига бўлинади.



Шимол нандуси (уни яна “катта нанду” деб ҳам аташади) баландлиги 150-170 см ва оғирлиги 25-50 кг ни ташкил қилади. Бу тур Амазонка бассейнидан Аргентинанинг Рио-Негро дарёсигача тарқалган.

Эму

Учинчи отряд – казуаросимонлар. Уларнинг яшаш жойи – Шимолий Австралия ва Янги Гвинея. Бу отрядга иккита оила киради: казуарлар (оддий казуар ва казуар мурука турлари) ва эму тури.



ТУЯҚУШЧИЛИК ТАРИХИ



Туяқушлар ер фаунасининг энг йирик қанотлилар вакили ҳисобланади. Инсон қишлоқ хўжалигига қизиқишни бошлагандан бери, туяқушлар ҳам уларнинг эътиборини тортган.

Туяқуш патларига инсонлар ҳар доим алоҳида эътибор қаратиб келган. Мисрда, яна Фиръавн даврида ҳам туяқуш патларини симметриялилик тузилиши туфайли адолатлилик (ҳаққонийлик, одиллик) белгиси деб ҳисобланган. Нафақат Миср савдогарлари, балки Вавильон ва Осурийлар ҳам туяқуш патлари билан жадал савдо олиб боришган. Вақтлар ўтиб туяқуш патлари бутун дунёда нафис безак ҳисобида жуда катта машҳурликка эришди. Уларни кийимлар,

бош кийим, причёска (тараб, муайян шаклга киритилган соч), елпиғичлар ишлаб чиқишда ва бошқа жузъий қисмлар, тафсилот, деталларга зеб-зийнат (безаш) беришда кенг қўлланилган. Машҳур туяқуш патларидан ясалган хотин-қизлар пар шарфи ҳозирги вақтда ҳам моданинг муҳим элементи сифатини йўқотмаган.

Туяқушчиликнинг бошқа маҳсулотлари ҳам инсоният эътиборидан четда қолмаган. Қадим замонда жуда мазали таъмга эга бўлган парҳез туяқуш гўшти учун уларни ов қилиш оммалашган. Ундан ташқари улардан олинган терилари кийим тайёрлашда ишлатилган. Туяқуш тухумлари ҳам ишга жалб этилиб, улардан суюқликларни сақлаш учун идишлар сифатида фойдаланишган. Инсонлар туяқушларни ўзлари қўл остида доим ушлаб туриб, боқилганда инсониятга қанча фойда келтиришини англаб етгандан кейин уларни ушлаб тутқунликда боқишни ташкил эта бошлаганлар.

Европа модасига туяқушлар XIII асрда кириб келади, шу даврнинг замонавий, ўзини ҳурмат қиладиган рицарлари ўз дубулғасини хурпайган туяқуш патлари билан безатишни лозим деб билган.

Ҳозирги вақтда фақат Европанинг ўзида 500 дан ортиқ яхши ривожланган туяқушчилик хўжаликлари мавжуд. Айниқса, Бельгия ва Франция давлатларидаги фермерлар орасида туяқушни боқиш оммавий тус олган.

Кейинги йилларда Молдова, Кавказ, Болтиқбўйи, Россиянинг Краснодар ўлкаси ва Волгоград вилоятларида туяқушчилик фермаларини ривожлантиришга катта эътибор қаратилмоқда.

■ I ТУЯҚУШЛАРНИ БОҚИШДА ИҚЛИМ ШАРОИТИНИНГ ТАЪСИРИ

Туяқушларни кўпайтиришда фермалардаги захлик, намгарчилик қушлар учун ўта хавфлидир. Одатда туяқушлар қаттиқ совуққа ҳам чидамли бўлади, фақат намлик паст бўлган жойларда. Аммо, жанубий кенгликларда биносиз шароитларда боқилганда ёмғирдан сақланиш учун пана жой керак бўлади. Туяқушлар учун паррандахонани маҳаллий шароитдан келиб чиқиб қуриш мумкин. Хона баландлиги 3 метр бўлиши лозим. Паррандахона катталиги туяқушлар сонига боғлиқ, ҳар бир туяқуш учун 10 м² майдон керак бўлади. Паррандахона эшиги очиқ сайр қилиш майдончасига олиб чиқиши керак.



■ I ТУЯҚУШ БОҚИШ УСУЛЛАРИ

Туяқушчиликни ривожлантириш – интенсив, яриминтенсив ва экстенсив усулларда олиб борилади.

Интенсив парвариш қилиш усули – фермер томонидан туяқушлар устидан тўлиқ



назорат олиб бориш. Ҳар бир туякуш алоҳида бўлмада (ка-такда) боқиш (стойло) дейилади.

Экстенсив парвариш қилиш усули – тескариси, туякушларга максимал даражада табиий шароитга яқин шароит яратиб бериш.

Яриминтенсив парвариш қилиш усули – юқорида кўрсатилган икки усулни ўзига жам қилади.

Бу ерда аниқ бир усул ни устун қўйиб, туякушчиликда мана шуниси юқори натижа беради деб айтиш жуда мушкул.

Фермерларни бир қисми туякушларни фақат экстенсив усулда парвариш қилади ва бу натижалар уларни қониқтиради. Бунда паррандаларни кичик гуруҳларда боқиш учун кенг яйловлар керак бўлади. Туякушларни эркин боқишда 10 бош туякушга 25 бош урғочиси ҳисобидан қўйилганда юқори самара беради. Эркакларини бир-бирига мос келишига катта аҳамият бериш керак бўлади. Экстенсив усулда парвариш қилинганда эркак туякушлар ўзлари назорат қилаётган маълум ҳудудни рақибидан табиатдагидан кам бўлмаган тажовузкорлик билан ҳимоя қилади. Лекин уларнинг тажовузкорлиги бошқа эркак туякушларга нисбатан қаратилган, инсонга нисбатан ўзини холис ва тўғри тутати. Урғочилари бутун яйлов ҳудуди бўйича бемалол ҳаракатланаверишади. Уларда битта эмас, бир нечта эркак туякушлар билан жуфтлашиш имкони бўлади ва бундан урчитилган тухум сони кўпайиши кузатилади.

Фермерларнинг кўпчилиги туякушчиликда интенсив ёки яриминтенсив усулда ишлашни афзал кўришади. Интенсив усул битта эркак туякушига иккита урғочиси тўғри келиши билан изоҳланади. Лекин, мавсумнинг ўрталарида эркак туякушни алмаштириш керак бўлади.

Туякушчиликда тажрибаси бўлмаган ва энди шуғулла-

нишни бошлаётган субъектларга яриминтенсив усулда парвариш қилиш тавсия этилади.

Туяқушларни жуфт-жуфт сотиб олиш керак бўлади, бир эркакка бир урғочи ҳисобидан. Айни шундай ўзаро нисбат энг мақбул натижани таъминлайди.

■ I ТУЯҚУШЛАРНИ СОТИБ ОЛИШ

Туяқушчилик билан шуғулланишни мақсад қилганда жиддий парваришни талаб этадиган туяқуш жўжаларини сотиб олиш шарт эмас. Катта ёшдаги туяқушларни жуфти билан сотиб олиш ҳам мумкин. Йирик туяқушчилик хўжаликларида нафақат санитария меъёрларига риоя қилинади, балки маҳаллий шароитга мослаштириш, мослашиш сифатларини, кўпайтириш шароитларини ҳисобга олган ҳолда ва келажакда парвариш қилиш селекция ишлари ҳам олиб борилади.

Туяқуш сотиб олинаётганда ҳар бир туяқушни яқин қариндошлик чатишиш бўлмаслиги учун келиб чиқишини аниқлаш керак. Иккинчидан, диққат билан ташқи кўриниши кўриб чиқилади. Тана тузилиши мутаносиб, ҳаракатлари енгил, бўйни эгилувчан, оёқлари бақувват бўлиши керак. Кўкрак қафасида озгина ёғ йиғилиш ҳолатлари бўлиши мумкин, лекин қорин қисми ичига тортилган бўлиши керак.

Туяқуш кўзини ҳам кўриқдан ўтказиш керак – улар зинҳор хира бўлиши мумкин эмас, кўздан бирор суюқлик ажралиб чиқмаслиги керак. Соғлом қушнинг тумшуғи силлиқ бўлади, эркак туяқушларнинг тумшуғи жинсий фаоллик мавсумида қизил рангда бўлади, бу меъёрда ҳисобланади. Туяқушларнинг патлари ялтироқ, қалин ва зич жойлашган

бўлиши керак. Соғлом туяқушларни қанотлари ва оёқлари симметрик ҳолатда, қийшайган бўлиши керакмас. Агар бармоғининг орқа бўғими ерга тегаётган бўлса, унда бу дефект ҳисобланади, одатта бундай бўлмайди. Юриши енгил ва текис бўлиши керак, юкини у томондан бу томонга ташлаб юриши керак эмас.

Туяқушлар одатда ҳаракатчан ва киришимли бўлади. Соғлом қуш яхши иштаҳаси билан ажралиб туради, атроф-муҳит ўзгаришига қизиқиш билдиради, доим қизиқиш уйғотади ва ташқи кўринишига эътибор бериб, патларини тозалашга кўп вақт ажратади.

■ | ТУЯҚУШЧИЛИК ФЕРМАСИНИ ТАШКИЛ ЭТИШ

Туяқуш фермасини ташкил этишда дастлаб қайси йўналиш бўйича фаолият кўрсатишини аниқлаб олиш керак. Хўжаликни ихтисослаштириш турлича бўлиши мумкин: полапонларни очириб чиқариш учун тухумни инкубация қилиш, туяқушларни гўштга боқиш, насли туяқушларни кўпайтириш, парранда зотини яхшилаш учун селекция ишларини олиб бориш. Туяқушчиликда ҳар бир йўналишнинг ўз фойда ва зарарли томонлари бор.



Энг кўп тарқалган йўналиш – полапонларни очириб чиқариш мақсадида тухумни сотиб олиш ва инкубация қилиш – камхаражат йўналиш, лекин сарф-харажатни жуда секин қоплайди (вақт кўп талаб этилади). Бу усулда фойда

олиш учун 2 йил керак бўлади. Бундан ташқари, урчитилган тухумнинг нархи, янги очиб чиққан туяқуш полапонининг нархидан кам бўлмайди ва халқаро бозорда бир неча юз АҚШ доллари атрофида бўлади.

Туяқушчилик фермасини барпо этишнинг энг қиммат, шу билан бирга, энг оддий усули бу кўпайишга тайёр катта ёшдаги туяқушларни сотиб олиш. Одатта бир жуфт ота-она туяқушлар нархи 2 000 АҚШ доллари атрофида. Катта ёшдаги туяқушларни сотиб олишда яхшиси 1 бош эркак туяқушга 2 бош урғочиси сотиб олинса, мақсадга мувофиқ бўлади. Хўжаликда ўнга яқин эркак туяқушларга нисбатан 2 баробар урғочи туяқушлар мавжуд бўлса, туяқушларнинг бир йиллик ўсиш сони 500 бошдан кўп бўлади.

Фермерлар орасида ярим ёшли туяқушларни харид қилиш унчалик машҳур эмас. Чунки бу ёшдаги туяқушлар нархи юқори бўлиб, уларни парваришлашда мураккабликлар мавжуд. Шу билан бирга, бундай ёшдаги туяқушларни гўштга сотиш дунё бўйича энг даромадли ҳисобланади. Шунинг учун янги иш бошлаётган фермерларга катта ёшдаги ота-она туяқушларни ёки урчитилган тухумларни сотиб олиш тавсия этилади.

Фермерлик хўжалигини ташкил этишда туяқушларни сотиб олишдан ташқари бошқа харажатлар ҳам бўлади. Хусусан, керакли бўлган бинолар тизимини қуриш, иситиш ускуналари, озуқа ва бошқалар. Кейинчалик паррандаларни янги ўрилган ўсимлик озуқаси билан таъминлаш учун яйловлар керак бўлади.

■ I ТУЯҚУШЛАРНИ ПАРВАРИШЛАШ УЧУН ПАРРАНДАХОНАЛАР

Мўътадил иқлим шароитида туяқушларни парваришlashда иссиқ паррандахона бўлиши кўзда тутилади. Паррандахонани қуришда ёғоч, ғишт, пахса ёки бетон – блоклардан фойдаланиш мумкин. Паррандахона ҳар бир катта ёшдаги парранда учун 10 м² майдондан кам бўлиши мумкин эмас. Хона шифтининг баландлиги етарли даражада бўлиши керак, катта ёшдаги туяқуш бошини жароҳатламаслиги учун тепасида яна 1 метрдан кам бўлмаган бўш масофа бўлиши керак.



Туяқушлар парваришланаётган хонада, албатта, табиий ёруғлик бўлиши лозим. Бунинг учун етарли микдорда деразалар бўлиши керак, тахминан ҳар 10 метр умумий майдонга 1 метр дераза туйнуги бўлиши керак. Паррандахонага бевоcита сайр майдони туташган бўлиши керак. Уялаш даврида туяқуш оиласи ўз секциясида бошқалардан ажралиб алоҳида қолиши учун тўсиқлар ўрнатилади. Хонада емдонлар албатта бўлиши керак, чунки туяқушларга зинҳор озукани ерга солиб бериб бўлмайди. Бундан ташқари емдонларни тўғридан-тўғри ерга ҳам қўйиб бўлмайди, уларни баландроқ жойлаштириш зарур бўлади. Айниқса, бетон емдонларни ерга ўрнатиш тавсия этилмайди, чунки озуқа тарқатиш вақтида туяқушлар бирданига емдонга ташланишиб жароҳатланиши

мумкин. Шу билан бирга металл емдонларни қўйиш ҳам тавсия этилмайди, айниқса, четлари текис бўлмаса. Биринчидан, бундай идишлар ўзларидан заҳарли моддалар ажратиб чиқаради ва яна занглайди, иккинчидан, металлнинг ўткир қиррасида қушлар жиддий шикастланишлари мумкин.



Одатан фермерлар осма қурилмалардан фойдаланишади, баландлиги ердан 1-2 метр юқориликда ўрнатилади. Маҳаллий усул сифатида иккига бўлинган автомобиль покришқаларидан емдон сифатида фойдаланилса бўлади, ичига тушган сув оқиб кетиши учун кичик тешиклар тешиб қўйилади. Арқон ёки симлар ёрдамида осиб қўйилади.

■ | ТУЯҚУШЛАР УЧУН САЙР МАЙДОНИ



Туяқушлар сайр майдончасида сайр қилишидан ташқари яна озикланиши ҳам керак. Ушбу экзотик қушлар ўтлоғини табиий яшаш шароитга яқинлаштириш учун тўсилган сайр майдони ичида ўтлоқ жойларни тошлоқ жойлар

билан аралаш келиши улар учун энг мақбул табиий шароит ҳисобланади. Бундан ташқари, туяқушлар сувда чўмилишни ҳуш кўради, шунинг учун сайр майдонида катта бўлмаган сув

ҳавзаси ёки сунъий равишда сувпуркагич, сувсачраткич ўрнатиш мақсадга мувофиқ бўлади.

Агар катта ёшдаги туяқушлар кўп миқдорда, яъни 100 бошгача бўлса, сайр майдони учун уларнинг 8 бошига 1 гектар ер майдони ҳисобидан ажратилади. Сайр майдони ҳамма томондан тўсилган бўлиши керак. Сайр майдонига тўсиқ сифатида фундаментга ўрнатилган хомага қотирилган металл сетка ўрнатиш қулай бўлади. Фақат металл сетка ячейкаси йирик бўлмаслиги керак, акс ҳолда қушлар бошини ичига тикиб шикастланиши, айрим ҳолларда нобуд бўлиши ҳам мумкин.

Тўсиқларни қуришда фундаментсиз, ходаларни ерга қўмиб ҳам қурса бўлади, лекин ҳар хил ёввойи ёки уй йиртқич ҳайвонларини (тулки, чиябўри, ит ва бошқалар) сайр майдонига кириш эҳтимоли кучаяди. Улар қушларга ҳамла қилишмаса ҳам қушларни қаттиқ қўрқитиб юбориши мумкин. Туяқушлар жуда сезгир бўлишади, шунинг учун уларни стресслардан сақлаш керак бўлади. Тўсиқлардан қушлар сакраб ўтиб кетмаслиги учун унинг баландлиги 2 метрдан кам бўлмаслиги, ҳатто ундан ҳам юқори қилиб ўрнатиш тавсия этилади. Мўътадил иқлим шароитида туяқушларга совуқдан кўра намлик, зах об-ҳаво кўпроқ зиён етказди. Агар яшаш ҳудудингизда тез-тез ёғингарчилик бўлиб турадиган бўлса, унда, албатта, шийпон ёки соябон қуриш тавсия этилади, масалан, девор ёки тўсиқ бўйлаб қуриш мумкин. Сайр майдонида емдонлар шийпонлар тагига қўйилса, ёғингарчилик вақтида емдондаги озуқа ҳўлланиб қолмайди. Қушлар ҳам қуруқ жойда яхши озиқланади.

Сайр майдони тўғридан-тўғри оғилхона (катак, бўлма)га туташган бўлиши керак. Ҳар бир оғилхонадан сайр майдонига алоҳида чиқиш йўли бўлиши керак. Сайр майдони ҳудуди 1 бош туяқуш учун ёшига қараб 10 м² дан 250 м² гача ажрати-

лади.

Сайр майдонини ўрашда, девор тўсиқ ўрнатишда бир-бирини инкор этувчи икки факторга эътибор бериш керак: сайр майдони узунлиги ва уни қуриш нархи. Сайр майдони тўғри бурчакли шаклда бўлиши ва томонларини ўзаро нисбати 1:5 дан 1:10 гача бўлиши керак. Томонлари тенг тўғри тўртбурчак (квадрат) шаклида бўлса, уни қуриш учун материал кам сарф бўлади, шунинг учун анча арзон тушади, лекин майдон томонларининг ўзаро нисбати қониқтирмайди.

Саноат ёки тижорат мақсадида туяқушларни парвариш қилишда 1 жуфт туяқуш учун 1,5-1,6 гектар ер майдони ажратиш керак бўлади, бундан ташқари, пайдо бўладиган наслини ҳам ҳисобга олиш керак. Туяқушлар иқлим шароитларига энгил мослашадилар, туяқушчиликни ҳосилсиз бўш ерларда, экин экишга яроқсиз ерларда ҳам катта муваффақиятлар билан ривожлантириш мумкин.

ТУЯҚУШЛАРНИ ПАРВАРИШЛАШНИНГ ЎЗИГА ХОС ХУСУСИЯТЛАРИ

Тутқунликда боқилаётган қуш нигоҳига иложи борица бегона шахслар тушмаслиги керак. Айниқса, бу хизмат кўрсатувчи ходимга тааллуқли, у албатта доимий бўлиши керак. Бундан ташқари доимий формали иш кийимини ҳам жорий этиш керак, хизмат кўрсатувчи ходимнинг ташқи кўринишида озгина ўзгариш бўлса ҳам туяқушлар эгаларини танисмай қолиши ва уни бегона



сифатида қабул қилиши мумкин. Бундай вазиятлар уларни стресс ҳолатига туширади ва тажовузкорликка ундайди. Стресслар туяқушлар ҳолатига негатив таъсир этади, айниқса, кўпайиш (урчиш) мавсумидан олдин сайр майдонида парваришлаш шароитига ўргатиш (мослаштириш) катта аҳамиятга эга. Туяқушларда ноқулайлик ҳиссини уйғотмаслик учун тухум қўйишдан тахминан бир ой олдин қушларнинг жойини ўзгартиришни тўхтатадилар. Бевосита жуфтлашиш ва тухум қўйиш даврида боқиш шароитига ҳар қандай ўзгартириш киритиш қатъиян мумкин эмас. Акс ҳолда урғочиси тухум қўйишни тўхтатиб қўйиши мумкин.

Паррандахонада хизмат кўрсатаётган ходим кескин ҳаракат қилмай, ўзини осойишта, хотиржам ва бамайлихотир тутиб ўз ишини бажариши керак. Қушларни кўрқитиб юбормаслик учун аста ҳаракатланиши лозим. Насл очиб чиқариш даврида тухумни кўриқлаётган эркак туяқуш ҳар доим хушёр бўлиб, сергак туришини эсдан чиқариш керак эмас, акс ҳолда, фермернинг ҳар қандай ҳаракатларини нотўғри тушуниб, тажовузкорлик (хужум) қилиши мумкин. Нафақат кўпайиш даврида, балки ҳар қандай вақтда ҳам туяқушларни стресс ҳолатга туширмасликка ҳаракат қилиш керак. Бу гала бўлиб яшовчи қуш, агар галадаги бирор қуш чўчиб кетса ва югуриб қочишни бошласа, унинг орқасидан қолганлари ҳам югуришни бошлайди. Хонада ёки кичик сайр майдончасида туяқушлар саросимага тушиб қолса, оқибатда қушлар жиддий жароҳат олишлари мумкин. Агар саросима оммавий бўлмаса, унда саросимага тушган қушнинг бошига капюшон кийдириб тинчлантириш мумкин.

Гала ичида тўқнашув чиқмаслиги учун ҳар бир қуш ўз худудида ичимлик сув манбаини топа олиши керак. Сайр майдонларида ҳар доим озодаликка риоя қилиниши керак.

Туяқушлар сим, арқон ва бошқа шунга ўхшаш хавфли нарсаларни ютиб юбориб жароҳат олмасликлари учун яйловларда бегона предметлар ётиши керак эмас.

Агар ёш туяқушларни транспорт воситасида ташишга тўғри келса, унда уларни ёшидан келиб чиқиб ҳар хил усуллар қўлланилади. 2 ойгача бўлган қушларни кўтариб ташиш мумкин. Бунда фермернинг бир қўли қушнинг устига, иккинчиси кўкрагининг тагига қўйилади. Оёқ ва қанотларидан қучоқлаб олинмайди. Қушларни қанотидан ушлаб кўтариш зинҳор мумкин эмас.

Ёши каттароқ қушларни кўтариб ташиб бўлмайди, лекин бир қўл билан қанотидан ушлаб туриб, иккинчи қўл билан думидан ушланади ва шу ҳолатда туяқушга йўналиш бериб бир



ердан иккинчи ерга ўтказиш мумкин. Ўсмир туяқушларни икки киши бўлиб бир ердан иккинчи ерга ўтказиш яна ҳам осонроқ. Олдинда кетувчи туяқушнинг тумшугидан ва бошининг энсасидан ушлаб олади, иккинчи одам (ҳодим) орқадан думғазасига қўли билан босиб қушни олдинга йўналтиради.

Қушлар орасида туяқушлар алоҳида сийдик пуфаги мавжуд бўлган ягона қуш ҳисобланади. Уларда нажас ва сийдикни ташқарига алоҳида-алоҳида чиқаради.

Туяқушнинг битта тухумидан товуқнинг 30 дона тухумидан тайёрланган ҳажмидек қўймоқ пишириш мумкин.

Туяқуш қанотларининг ёзилгандаги узунлиги 2 метрни ташкил этади.

■ I ТУЯҚУШЛАРНИ ОЗИҚЛАНТИРИШ

Туяқушларга рационни тўғри тузиш учун озуқа таркибидаги моддалар айнан қайси мутаносибликда бўлиши шартлигини билиш керак бўлади.

Оқсиллар (протеин) – туяқушлар организми учун ҳам зарур модда ҳисобланади. У дуккакли ўсимликларда катта миқдорда бўлади. Туяқушларни озиқлантиришда оқсил манбаи ҳисобида соя дуккаги, бўрилуқкак (люпин) ёки сигир нўхати (ўтсимон ўсимлик)лардан фойдаланилади.

Углеводлар (карбонсув) – озуқа базасини асосий таркиби ҳисобланади. Айнан углеводлар организмни энергия билан таъминлайди. Бундан ташқари, улар организмнинг ёғ қатламларида захирага тўпланиш хусусиятига эга. Ҳалла ўсимликлари: маккажўхори, арпа, сули, тариклар углеводларга бой бўлади.

Организмни тўғри фаолият юрғизиши учун туяқушларга скелетини ривожланиши ва мустаҳкамланиши мақсадида яна минерал қўшимчалари зарур бўлади. Минерал моддалар кепак, тухум қобиғи ва суяк унида кўп миқдорда бўлади. Минераллар манбаи бўлиб туяқушлар учун яна кўк озуқалар ҳам ҳисобланади.

Ширали озуқалар витаминларга бой бўлиб, организмдаги иммун тизимини кучайтиради. Айниқса, қиш мавсумида витаминли моддаларни бериш жуда муҳим. Чунки шу даврда



туяқушларга кўк озуқа берилмайди. Ушбу даврда витаминлар манбаи бўлиб пичан хизмат қилади.

Тутқунликда бўлган туяқушларни нафақат организмга керак бўлган, балки маҳсулдорлигини ошириш учун ҳам зарур бўлган миқдорда тўйимли озуқалар билан таъминлаш керак. Бунинг учун рационнинг асосий қисми енгил ҳазм қилинадиган озуқалардан таркиб топиши керак бўлади. Озуқа таркибидаги ҳазм бўлмайдиган таркибий қисми (компонентлар) озуқанинг тўйимлилигини таъминлаб бера олмайди. Ҳатто туяқуш бир кунда 5-7 кг озуқа истеъмол қилган тақдирда ҳам етарли миқдорда тўйимли моддалар қабул қилмайди.

Бундан ташқари, озуқанинг таъмига ҳам эътибор қаратиш керак бўлади. Агар озуқа яхши ҳазм бўладиган бўлса, лекин таъми мазали бўлмаса ҳам уни хоҳламай истеъмол қилади. Одатда ушбу муаммога озуқа рационига ширали озуқалар: қовоқ, шолғом, лавлаги ва шунга ўхшашлар қўшиш билан барҳам берилади.

Катта ёшдаги туяқушларга бир кунда икки маҳал озуқа берилади. Бир ёшдан катта бўлган туяқушлар ҳам шу усулда озиқлантирилади. Бир ёшгача бўлган ёш туяқушларга кунига 3-4 маҳал озуқа берилади.

Қушнинг ёшига қараб озуқа таркибидаги тўйимли моддалар ўзаро нисбати катта фарқ қилади.

Туяқушларга ичимлик суви беришни ҳам эътиборга олиш лозим. Гарчи катта ёшдаги туяқушлар чанқоқликни енгил ўтказсалар (чидамли) ҳам ичимлик сувини катта миқдорда, иштаҳа билан ютади. Туяқушларга озиқланиш вақтида ичимлик суви бериш мақсадга мувофиқ бўлади.

Ёш туяқушлар катта ёшдаги туяқушларга нисбатан ичимлик сувига кўпроқ муҳтож бўлишади. Туяқушчаларни доимий ичимлик суви билан таъминлаб туриш тавсия этилади.

Сувдонлар доим тозаланиб, тоза ичимлик суви билан тўлдирилиб турилиши керак. Ҳар доим ичимлик суви билан таъминлаб туриш, туякушчаларнинг қаровсизлик оқибатида нобуд бўлишидан асрайди.

Туякушлар рациони

Фермада боқилаётган туякушларни рациони бошқа кушларникидан унча фарқ қилмайди. Фермер йўнғичқа (беда)ни қишга пичан кўринишида тайёрлаши керак бўлади, ундан ташқари омухта ем, витаминли қўшимчалар ва чиғаноқлардан фойдаланилади.

Йўнғичқа (беда) – туякушлар озуқаси таркибий қисмининг асосини ташкил этади. Қишда кушлар пичан истеъмол қилишади, иссиқ мавсумда эса кўк масса истеъмол қилади. Бундан ташқари туякушларга бериш учун беда уни ҳам тайёрланади. Бедага ҳар бир бош туякушга бир кунда 1,5 кг ҳисобидан омухта ем ҳам қўшилади.

Шу билан бирга уларга яна бошқа ўсимликлар ингредиентлари керак бўлади. Улар орасида кенг тарқалганлари: буғдой, тарик, сули, соя дуккаги ёки унинг уни, майдаланган маккажўхори, нўхат, буғдой кепаклари. Озуқа таркибига балиқ ва суяк унлари, қобиғидан тозаланган тухум, сут, сут зардоб, гидролиз хамиртуруши, ош тузи ва витамин – минералли комплекслар албатта кириши лозим.

Қишга тайёрланган пичан таркибига бедадан ташқари яна бошқа турли хил ўтларни ҳам қўшиш мумкин. Ҳаммадан кўра пичанга мос келадигани ўтзорда ўсадиган йўнғичқа (қизил беда) ва ерга ёйилиб (ер бағирлаб) ўсадиган йўнғичқа (оқ беда), ўтзорда ўсадиган бетага (ғалласимон ўсимлик), қўноқ ўт (қўнғирбош), кўп йиллик мастак (бегона ўт) ва эспарцет (озуқабоп дуккакли ўсимлик)лар ҳисобланади. Пичан

унини бошоқли ўтлардан, силосни маккажўхори, кунгабоқар, карам ёки турли хил ўтлардан тайёрлаш мумкин.

Қиш мавсумида туяқушлар рационига сабзавотлар қўшиш мумкин, шулардан сабзи, карам, лавлаги, хашаки шолғом, қовоқ, брюква (шолғомсимон сабзавот) ва картошкалардир. Сабзавотларни емдонларга солишдан олдин майдалаш, картошкани эса пиширилган ҳолатда бериш тавсия этилади. Озиқ-овқат чиқиндиларини ҳам майдаланган ҳолатда йирик бўлмаган фракцияларда емдонларга солиб бериш мумкин.

Туяқушларни интенсив парвариш қилиш усулида озиқлантириш



Агар туяқушчилик фермасида яйловсиз боқишни ташкиллаштирилаётган бўлса, уларга майдаланган кўк озуқа ва пичан ҳамда омухта ем концентрати керакли миқдорда етказиб берилиши керак бўлади. Мах-

сус омухта ем концентрати бир бош паррандага 1,5 кг ҳисобидан кўк озуқага аралаштириб берилади. Кўк озуқа турли ўтлардан таркиб топган бўлса мақсадга мувофиқ бўлади. Унинг таркибида турли хил ўтзорда ўсадиган ўтлар, рапс, беда, исмалоқ (шпинат) ва бошқа серсув ширадор ўтли ўсимликлар бўлади. Кўк озуқанинг миқдори қушлар истеъмол қилиш ҳажмига қараб белгиланади.

Тухум бериш пасайиши даврида озуқа таркибидаги омухта ем концентрати миқдорини камайтириш ёки арзон озуқа аралашмасидан фойдаланиш мумкин. Лекин тухум бериш

даври бошланишидан олдин озуқа таркиби кучайтирилади ва бутун тухум бериш даврида шу даражада ушлаб туриш керак бўлади. Тухум бериш даврида ва шу даврнинг охиригача юқори даражада тўйимли озуқани тўхтатмасдан доимо бериб бориш жуда муҳим, ҳатто, қисқа муддатли озуқа камайиши ҳам тухум беришни тўхтатиб қўйиши мумкин. Тухум беришни ўша даражага кўтариш учун 1 ой муддат керак бўлади.

Интенсив парвариш қилиш усулида туяқушларга ҳазм қилиш органлари яхши ишлаши учун йирик қум ва тош бериш лозим. Озуқа таркибига қўшиладиган айрим ингредиентларни: ўсимлик ёғи, балиқ уни, бор, витамин-минералли комплекс, дикальций фосфат, рух (цинк), бицитрат, метионинлар керакли миқдорда қўшилади.

Туяқушларни якуний озиқланиш рациони ишлаб чиқилмаган. Ёшидан келиб чиқиб туяқушларга мувозанатлашган витамин, минерал моддалар ва керакли миқдорда хом клетчатка берилиши керак.

Туяқушлар учун энергия алмашинуви ва тўйимли моддалар нормаси

Кўрсаткичлар	Рацион тури		
	Бошланғич (стартовый)	Ёш туя- қушларга	Катта ёшдаги туяқушларга
Энергия алмашинуви, ккал/кг	2540	2430	2485
Хом протеин, %	18	19	20
Хом ёғ, %	4	4,25	4,4
Хом клетчатка, %	8	10	10

Сувсизлантирилган клетчатка, %	15	15	16
Кальций, %	2	2	2,5
Фосфор, %	1	1	1
Лизин, %	1	1	1,2
Метионин, %	0,34	0,34	0,4
Цистин, %	0,3	0,3	0,3

Туяқушлар озуқаси типик ингредиенти (мураккаб бирикма ёки қоришманинг таркибий қисми)да қуйидагилар бўлиши мумкин: майдаланган маккажўхори, тарик ва буғдой, соя дуккакли шроти, соя дуккаги синиқларидан ун, бадиқ уни, гидролиз хамиртуруши, беда (ўт) уни, карбонат кальций, моно- ва дикальций фосфат, ош тузи, витамин ва минерал премикслар.

Қишда туяқушларни турли ўтлардан: ўтзорда ўсадиган бетага (ғалласимон ўсимлик), кўп йиллик мастак (бегона ўт), ўтзорда ўсадиган қўноқ ўт (қўнғирбош), оқ сўхта (ўт тури), ўтзорда ўсадиган беда (қизил беда) ва ер бағирлаб ўсадиган беда (оқ беда), озуқабоп эспарцет (озуқабоп дуккакли ўсимлик) ва экиладиган сераделлалардан тайёрланган пичан билан озиқлантириш тавсия этилади.

Туяқушларнинг озуқага бўлган йиллик талаби

Озуқа	Йиллик талаб, кг
Омухта ем ПК – 5 (0 дан 6 ҳафтагача)	12-18
Ем концентрати (6 дан 16 ҳафтагача)	100
Майдаланган маккажўхори ёки унинг силоси	120-125
Беда уни	120
Янги ўрилган кўк ўт (йилнинг иссиқ мавсумида)	200

Туяқушларга қўшимча озуқа сифатида саноат ва озиқ-овқат чиқиндиларини, кунжара ва шрот (3 ойлик ёшигача фақат соя шроти), майдаланган сабзавотлар, пиширилган картошка, гўшт-суяк уни берилади. Туяқушлар чанқоқликни енгил ўтказади, лекин сув бўлса, иштаҳа билан кўп миқдорда тўйиб ичади. Шунинг учун сувни чегараланмаган миқдорда эркин бериш керак.

Катта ёшдаги қушларга ва ёши бир ёшдан юқори ёш қушларга озуқа кунига 2 маҳал берилади, бир ёшгача бўлган ёш туяқушларга кунига 3-4 маҳал берилади.

Туяқушларни интенсив парвариш қилиш усулида боқишда турли ёш гуруҳларига қараб бериладиган озуқа таркиби қуйида кўрсатилган.

**Бир кунликдан то катта ёшдаги туяқушлар учун озуқа
рационининг намунаси
(1 кг тирик вазн учун г ҳисобида)**

Ингредиентлар	0-2 ойлик, бир-ламчи давр	2-4 ойлик, бош-лангич давр	4-6 ойлик, ўс-мир давр	6-10 ойлик, ўс-мирдан кейинги давр	10-14 ойлик, ўсиш охириги давр	14 ойлик ва ундан юқори ёшда, асосий давр
Беда	22,7	260	428	812	884,6	420
Маккажўхори	577	501,3	463,5	172,7	100	0
Макка ёғи	20	20	0	0	0	0
Соя ёғи	232	86	30	0	0	0
Балиқ уни	120	106	59	0	0	8,9
Дикальций фосфат	5,3	7,4	11	11	11,2	15
Қиздирилган бўр	17	12,3	3	0	0	0

Метионин	1	2,23	1	1,4	1,7	1,6
Витамин – минералли премикс	4,5	4,5	4,5	2,5	2,5	2,5
Цинк бицитрат	0,5	0,5	0	0	0	0
Беда пичани	0	0	0	0	0	552

Майдаланган чиғаноқ ва озуқабоп оҳак (известняк) ҳар доим эркин ҳолда алоҳида емдонларда бўлиши керак, чунки туяқуш болалари бўйининг интенсив ўсишида суякни шакллантириш катта аҳамият касб этади (биринчи 6 ойда ҳар ойда 30 см гача ўсади).

Туяқушлар томонидан истеъмол қилинаётган озуқа миқдори, биринчидан, уларнинг ёшига ва озуқанинг энергетик қувватига боғлиқ. Ўсаётган туяқушлар учун бир кунлик озуқа истеъмоли ўз тирик вазнининг 3-4 фоизини ташкил этади. Катта ёшдаги туяқушлар бир кунда тирик вазнига нисбатан 2,5% атрофида озуқа концентрати истеъмол қилади.

Туяқуш жўжаларининг 1 кг тирик вазн олиши учун 1,4-2,1 кг озуқа истеъмол қилиши керак бўлади. 3-6 ойлик ёш туяқушларнинг 1 кг тирик вазн олиши учун 2,6-3,0 кг озуқа талаб этилади ва ўсишнинг якунловчи босқичида (7-12 ойликда) бу нисбат 4,1-15,0 кг озуқа сарфини ташкил этади.

Туяқуш томонидан бир кунда ичиладиган сув миқдори иқлим шароитлари ва истеъмол қилинган озуқа турига боғлиқ. Катта ёшдаги туяқуш юқори ҳарорат ва паст намлик кўрсаткичида бир кунда 12 литр сув ичади.

Зарур бўлган вақтда В гуруҳидаги витаминлар ва биотин препаратларини озуқага ҳар бир бошига 5 г ҳисобидан қўшилади.

Туяқушларни яриминтенсив парвариш қилиш усулида озиклантириш



Яриминтенсив парвариш қилиш усулида туяқушларни озиқлантириш катта муаммолар келтириб чиқармайди. Қушлар етарли даражада керакли бўлган миқдорда барча озуқа компонентларини осонгина яйловда эркин ўтлаш ва

тўйимли омухта ем концентрати истеъмол қилиш орқали олади.

Лекин туяқушлар учун яйлов бу усулда боқиш учун сифатли бўлиши керак. Табиий шароитга максимал даражада яқинлаштирилган муҳитда табиий озуқани истеъмол қилиш фойдадан ҳоли эмас.

Наслдор қушлар учун кўпайиш даврида кучли тўйимли озуқа бериш керак. Наслга мўлжалланган туяқушлар махсус қўшимча рацион билан таъминланиши керак. Қиш мавсумининг биринчи 2 ойида туяқушларнинг ҳар бирига 1 кг дан гранулаланган концентрат бериш тавсия этилади. Парваришlash даврининг кейинги ҳафталари озуқа концентрати миқдори 3 кг гача кўпайтирилади. Шу билан бирга, майдаланган кўк озуқани концентратга қўшиш зарур бўлади. Агар кўпайиш мавсумининг бошида насли туяқушлар жуфтлашиш учун тайёрлигини билдирувчи белгилари пайдо бўлмаса, озуқа сифати яхшиланиб, миқдори кўтарилади.

Туяқушларни экстенсив парвариш қилиш усулида озиклантириш

Агар туяқушлар фермада экстенсив усулда парваришланаётган бўлса, асосийси – катта микдорда сифатли яйлов майдонлари билан таъминлаш керак бўлади. Бунинг учун атрофи тўсилган бепоён (кенг) ҳайдалмайдиган ер майдонлари талаб этилади.



Агар фермада бошқа ҳайвонлар ҳам боқилаётган бўлса, уларни туяқушлар билан бирга боқса бўлади. Табиий шароитда ҳам туяқушлар зебралар, жирафалар ва бошқа ўтхўр ҳайвонлар билан бирга бепоён яйловларда ўтлаб юришади. Шунинг учун тутқунлик шароитида бошқа ўтхўр ҳайвонлар билан биргаликда яйловда ўтлаш шароитини табиий муҳитга яқинлаштиради.

Экстенсив тизими фермада қўлланилаётган бўлса, озуқа харажати унча кўп бўлмайди, чунки озуқанинг асосий қисмини қушлар яйловда ўзлари топиб истеъмол қилишади. Лекин туяқушлар парваришланаётган бундай усул кўпроқ маҳаллий табиий иқлим шароитларига боғлиқ бўлади.

Агар иқлим шароитлари ёмонлашиб, ёмғир ёки қурғоқчилик бошланса, қушлар ўзини яйловда озуқа билан тўлиқ таъминлашига ишониб бўлмайди. Бундай ноқулай иқлим шароитларида фермадаги қушларга қўшимча равишда озуқа бериш керак бўлади.

Туяқушларни тухум қўйиш даврида озиклантириш

Тухум қўйиш мавсумида туяқушлар озикланишини



алоҳида назоратга олиш керак. Лекин эркаги ва урғочисининг озуқага бўлган талаби бу даврда бир хил эмас. Урғочиси тухумнинг қобиғини сифатли шакллантириш учун рацион таркибида кальций моддаси миқдори юқори бўлишига

муҳтож бўлса, рацион таркибида кальций моддаси миқдори юқори бўлган озуқа эркагига зиён бериши мумкин. Кальций моддаси маний (сперма)ни ишлаб чиқаришда алоҳида аҳамиятга эга бўлган рух (цинк) моддасини организм томонидан ўзлаштиришга тўсқинлик қилади.

Бундан ташқари туяқушнинг эркагига кўп озуқа истеъмоли қилиш зарарли, чунки семириб кетиш ёмон асоратларга олиб келади, натижада тухумни уруғлантириш фоизи тушиб кетади, аммо урғочиларидан сифатли тухум олиш учун кучайтирилган тўйимли озуқа бериш керак бўлади.

Тухум олиш мавсумида туяқушларнинг эркаги ва урғочилари учун алоҳида озуқа рационини ташкил этиш керак бўлади. Туяқуш эркаги бу давр ичида озуқа рационини ўзгартирмасдан, алоҳида сайр майдонида боқилади. Ҳар иккинчи кун туяқуш эркагини жуфтлашиши учун урғочиси сайр майдонига қўйиб юбориш тавсия этилади, бунинг учун бир неча соат бирга бўлиш етарли бўлади. Туяқуш эркагини урғочисининг сайр майдонига, урғочилари озуқанинг катта қисмини еб бўлишгандан кейин қўйилади.

■ I ТУЯҚУШ ЖЎЖАЛАРИНИ ОЗИҚЛАНТИРИШ

Озиқлантириш ва санитар-гигиеник шароитлар – асосий икки факторлар, ёш туяқушларнинг нобуд бўлмасдан омон қолиши учун бевосита таъсир ўтказувчи омиллардир ва фермада туяқушчилиكنинг ривожланиши ҳам мана шу икки омилларга боғлиқ.

Дунёга энди келган туяқуш жўжаси биринчи кунлари киндик қисмида жойлашган қопчадаги тухум сариғини сарфлаш ҳисобига яшайди, шунинг учун ҳаётининг биринчи кунлари озуқага эҳтиёж сезмайди. Аммо барибир туяқуш жўжалари бу кунлари озуқа билан таъминланиши керак. Бир кунда икки маҳал озуқа истеъмол қилувчи катта ёшдаги туяқушлардан фарқли ўлароқ, туяқуш жўжалари емдонларида ҳар доим озуқа бўлиши керак. Бундан ташқари сувдонларда ичимлик сув бериш ҳам эсдан чиқмаслиги керак. Катта ёшдаги туяқушлар узоқ муддатли сувсизликни енгил енгиб ўтади, лекин ёш туяқушлар доимо сувдонларда ичимлик суви бўлишига эҳтиёж сезади. Ҳар куни сувдонларни тозалаб, ювиб ва сувини алмаштириб туриш орқали тозаликни, гигиенани сақлаб туриш жуда муҳим.

Туяқуш жўжаларига концентрат ва майдаланган кўк бедадан таркиб топган озуқа, суюқ аралашма ҳолатида берилади. Уларга бериладиган озуқа таркибидаги ўсимлик пояси ва бандлари олиб ташланади, чунки ичак фаолиятини бузиш эҳтимоли мавжуд. Озиқа таркибидаги дағал толали ўсимликлар компонентлари туяқуш жўжаларининг жиддий тарзда ичи қотиб қолишига олиб келиши мумкин.

Туяқуш жўжалари 4 ойлик ёшга етгунча озуқа таркибидаги клетчатка (целлюлоза) миқдори чегараланган бўлиши керак. Биринчи ойлари беда майдонларида жўжаларни боқиш мумкин

эмас, кейинчалик клетчатка миқдорини аста-секинлик билан ошириб бориш мумкин бўлади.

Туяқушлар боқилаётган ҳудудда катта бўлмаган қум уйма-си, чиғаноқ, озуқабоп оҳак ва тошлар тўпламини ташкил этиш керак бўлади. Таркибида оҳак компоненти мавжуд бўлган озуқа қўшимчалари жадал суръатлар билан ўсаётган туяқушнинг жўжалари учун скелетини шакллантиришда катта аҳамиятга эга. Туяқуш жўжалари ҳаётининг биринчи ярим йиллигида ҳар ой 30 см гача ўсади.

Ўз ҳудудида айланиб юрган туяқуш жўжалари тошлар, тухум қобиғи ва сабзавот бўлақларини, учраган ҳамма нарсани иштаҳа билан ютиб юборади. Туяқуш жўжалари томонидан катта миқдорда ютиб юборилган тош ва қумлар озуқа ҳазмини нормаллаштиради.

Агар табиий озиқа таркибида витаминлар миқдори кам бўлса, қўшимча равишда витаминларни алоҳида ичимлик сувига қўшиб берса бўлади. Биотин ва В гуруҳидаги витаминларни ҳар бир қушга 5 г ҳисобидан қўшиш тавсия этилади.

Туяқуш жўжаларини катта ёшдаги туяқушлар билан бирга боқиш маъқул усул эмас. Бундай усулда юқумли касалликлар билан оммавий тарзда зарарланиш хавфи туғилади, айниқса, ёш туяқушлар катта ёшдаги туяқушлардан ўта хавфли касалликларни юктириб олиши мумкин.

ТУЯҚУШ ПАТЛАРИНИ ЙИҒИШ

Туяқушларда мавсумий линька (туллаш) бўлмайди, доимий равишда патлари аста-секин алмашиб боради. Шунинг учун тижорат мақсадида фермерлар вақти-вақти билан туя-

қушлар патларини териб (юлиб) туради. Бу тадбирдан патларни йиғиш билан бирга туяқушлар терисининг сифати яхшиланади. Патларни юлиб олишдан қолган патлар илдизининг фолликула излари қанча кўп бўлса, шунча туяқушлар терисининг баҳоси (қиммати) ошади.

Ўсиб чиққан патда қон томирлари тери юзигача тўлиқ қурийдими, аммо тери юзасидан пастдаги пат ўзаги (стволи) ўсишда давом этади. Патлари кесиб олинганда қушлар оғриқ сезмайди.

Бироқ “яшил сатҳи”дан пастда жойлашган ствол қисмига тегиш мумкин эмас, чунки туяқушлар оғриқ сезади ва қон кетиши мумкин. Патларни патнинг қудуқчасидан 6-8 см дан юқори бўлган жойидан кесилади.

Қанот патлари ярим йилда етилади, тўлиқ шаклланиши учун 8 ой вақт керак бўлади. Шунинг учун патлар бутун юлиб олинмайди, тўлиқ пишиб етилмасидан олдин ўзак қатлами юқорисидан кесилади. Бу вақтга келиб патлар шаклланган бўлади, лекин бузилмаган ва яроқсиз ҳолга ҳали келмаган бўлади. Агар патлар қудуқчасида тўлиқ пишиб етилгунича қолдирилса, натижада патлар сифати бузилиб, яроқсиз ҳолатга келиши мумкин. Патлар махсус асбоб – секатор (токқайчи, гулқайчи) ёрдамида кесилади.

Пат қудуқчаларида қолган патлар стволи (ўзаги) қолдиқлари тўлиқ пишиб етилгандан кейин, яъни тахминан 2 ойдан кейин олиб ташланади. Улар омбур ёрдамида олиб ташлангандан кейин жойига ёғлиги юқори бўлган бирор-бир крем суртилади. Мойлаш пат қудуқчаларини қичишиш ва ифлосланишдан сақлайди. Маълум вақтдан кейин олиб ташланган патнинг ўрнидан янгиси ўсиб чиқишни бошлайди. Бир кунда туяқуш пати тахминан 50-75 мм ўсади.

Туяқушларнинг патлари ҳар 6 ойда терилса, патлар қаттиқ

ва калта бўлади, шу билан бирга, сифати анча паст бўлади. Шунинг учун патлар йилда бир ёки 8 ойда бир марта терилади.

Саккиз ойлик интервални маҳаллий иқлим шароити бир маромда ва ўсимликларга сероб жойда, қушлар йил давомида керакли витаминлар ва минералларга бой, тўйимли қўқ озуқа истеъмол қила оладиган шароитларда қўлланилади. Биринчи марта ёш туяқушларнинг ярим йиллик ёшида патлари кесилади. Шундан кейин 16 ойлик ёшида ва кейингиси 2 йиллик ёшида, бу тизимда 2 йил давомида 3 марта патларни теришга эришилади.

Агар маҳаллий иқлим мавсумлар орасида кескин фарқ қилса, мавсумнинг совуқ вақтларида патларни ўсиши секинлашини инобатга олиш керак бўлади. Шунинг учун туяқушларнинг патларини кесиш бир йилда бир марта амалга оширилади.

Туяқушлар патларини теришни жинсий инстинктлари ўй-ғонгунга қадар амалга оширилади. Ушбу патларни териш жараёнида қушларнинг физиологик ҳолатига аҳамият берилади. Агар туяқуш касал, ҳолдан тойган, заифлашган, ориқ бўлса, янги патларини сифати талабга жавоб берадиган бўлмайди. Шунинг учун патларни кесишни туяқуш соғайиб ва яхши кондицияга етгандан кейин бажарилади.

Агар паррандани 12-14 ойлигида сўйиш режалаштирилган бўлса, унда 7 ойлик ёшида патларини кесиб олса бўлаверади. Бунинг учун махсус мослаштирилган патларни кесиш учун қути (яшик) тайёрланади. Патларни кесиш учун қути – учқиррали қурилма. Олди (фронтал) томонининг эни 50 см, орқа томони – 70 см, қути узунлиги ва чуқурлиги 120 см ни ташкил этади.

Патларни кесиш жараёнидан олдин туяқушлар сайр майдонига йиғилади, шундан кейин патларини кесиш учун биттадан қутига ҳайдалади. Дастлаб икки қатор узун оқ патлари кесилади, сўнг қанотининг пастки қисмидаги икки қа-

тор ипак патлари юлиб олинади. Кейин қанотидаги ва ду-мидаги оқ патлари кесиб олинади. Патларни кесиш вақтида 25 мм узунликда тери устида стволи (ўзаги) қолдирилади. Улар 2 ойдан кейин тўлиқ олиб ташланади.

■ ТУЯҚУШЛАРНИ КЎПАЙТИРИШ



Туяқуш эркаги 4-5 ёшида жинсий вояга етади, урғочиси эса 1 йил аввал тухум қўйишни бошлайди. Шунинг учун кўпайтириш мақсадида жинсий етук туяқушлар ва мос равишда ҳар иккала жинсдан ҳам ҳар хил ёшдаги қушлар сотиб олинади. Ана шунда туяқушлардан биринчи мавсумнинг ўзида насл олиш мумкин.

Туяқушларни 15 ойлигидан бошлаб жуфтлашиш мавсумидан бошқа даврларда эркаги ва урғочиси алоҳида-алоҳида ушланади. Бу даврда туяқушлар организми тўлиқ дам олиши ва янги жуфтлашиш, тухум қўйиш мавсумигача куч йиғиш учун қарама-қарши жинслар алоҳида ажратиб боқилади.

Туякуш эркагини жинсий балоғатга етганлигини болдининг ва тумшуғининг қизарган рангига қараб билиш мумкин. Танасининг мана шу қисмларини айниқса, ёрқин қизил рангга кириши жинсий балоғатга етганлигининг энг юқори чўққисига чиққанлигини англатади. Ва акси жуфтлашиш мавсумида уларни рангсизланиб бориши, ушбу туякуш эркаги жинсий қуввати (фаоллиги)нинг пасайиб боришидан дарак бўлади. Одатда бу ҳолатда тухумларнинг уруғланиш фоизи камайиб кетади, шунинг учун қувватсизланиб, ориқлаб қолган туякуш эркагига дам бериш ва қувватга кириши ҳамда унумдорлиги тушиб кетмаслиги учун алмаштирилади.

Туякуш эркаги нафақат жинсий фаоллиги, балки темперменти бўйича ҳам тоифага ажратилади. Жуфтлашиш даврида туякушнинг турли эркаклари урғочиларига нисбатан ўзини қандай тутишига ҳам алоҳида эътибор берилади. Айримлари ўзларини босиқ ва сабрли тутати, улар шошилмайди, “жуфтлашиш рақси”ни ўзининг бўғиқ “қўшиғи”ни ижро этган ҳолда мамнуният билан амалга оширади ва урғочиси билан эҳтиёткор бўлиб алоқа қилади. Лекин, баъзи эркак туякушлар шошилмасдан, урғочисига эътибор кўрсатмасдан, унга нисбатан тажовузкор бўлади ва жисмоний жароҳат ҳам етказиши мумкин. Бундай туякуш эркаклари чиқитга чиқарилади.



Туякуш урғочиси жуфтлашиш мавсумида жуфтлашишига тайёр бўлса ўзини мос равишда тутати. Улар ҳам унга эътибор қаратган эркаги олдида ерга эгилиб ва қанотларини тушириб ўзига хос “рақс” тушади. Эркагининг эътиборини баҳолаб, урғочиси бошини пасайтиради ва

шу вазиятда жимиб қолади. Бу эркаги учун жуфтлашишни бошлашига сигнал бўлиб хизмат қилади.

Жуфтлашиш вақтида туяқуш эркаги жимиб қолган урғочисининг орқасидан яқинлашади, бир оёғини унинг танасига тираб, иккинчи оёғини елкасининг устига қўяди. Туяқушларнинг жуфтлашиш акти одатда 5-10 дақиқадан кам бўлмайди.

Ота-она туяқушлар тухумларни навбат билан босиб ётади, ҳатто отаси онасига нисбатан наслни очириб чиқаришда кўпроқ иштирок этишга ҳаракат қилади. Шунинг учун наслдор отанинг тухум босишига йўл қўймаслик керак. Ота туяқуш тухумни босишни бошласа, унинг мояки кичиклашади ва у уруғлантириш хусусиятини пасайтиради ёки йўқотади. Маҳсулдорлик пасайишини олдини олиш мақсадида эркаги тухум босишга ҳаракат қилмасдан, урғочиси билан жуфтлашиб туриши керак ва маҳсулдорлик тушиб кетмаслиги учун туғилган тухумлар ўз вақтида олиб турилиши керак.

Африка туяқуши тухумининг оғирлиги тахминан 2,2 кг ни ташкил этади. Ҳар бир урғочи туяқуш ҳар куни эмас, кун ора – куннинг иккинчи ярмида тухум қилади. Бир циклда ўртача 18-20 дона тухум беради, кўпайиш учун шароит яратиб берилса, бир йилда бундай циклдан 5 тагача бўлади.

Туяқушларнинг уяга оид даври март-апрель ойидан октябрь ойигача давом этади. Урғочи туяқушларнинг тухум қўйиши циклларга бўлинади, цикллар орасида 8-10 кун тухум қўйишдан тўхтаб олади (пауза қилади). Йил давомида урғочи туяқушларнинг ҳар бири 60 донадан (аниқ) тухум беради. Ушбу тухумларнинг 80 фоизи уруғланган бўлади. Уруғланган тухумларнинг 85 фоизидан туяқуш жўжалари (полапонлари, қуш боласи) очиб чиқади. Тухум инкубацияси 42 кун давом этади ва қуш боласи одатда 2-3 кун давомида дунёга келади. Туяқуш жўжаларининг тухумга оид тишлари бўлмайди, шу-

нинг учун мустаҳкам тухум қобиғидан бакувват оёқларининг каттиқ тирноқлари ёрдамида чиқиб келади.

Биринчи йили уруғланган тухумлар сони йил давомида 25 донадан кам бўлса, унда бундай урғочи туяқушлар браковка қилинади.

Тухумни инкубация қилиш

Туяқуш эркаги урчиш даврнинг бошида жуфтлашиш учун



ўзига бир нечта урғочи туяқушларни танлаб олиб, унча чуқур бўлмаган чуқурликдан иборат уя тайёрлайди. Кўпинча уя қуриш учун ерни фермадан ташқарида ёки нокулай бўлган жойни танлайди, масалан, фермер юрадиган йўлакни. Шунинг учун урчиш

даврида қушлар ўзларига ажратилган ҳудудни ташлаб кетмаслиги учун эътиборлироқ бўлиш керак бўлади. Бунда ферма ҳудудидан туяқуш эркагига ёрдам сифатида олдиндан уя учун чуқурча қазиб қўйиш мумкин. Чуқурчанинг тагини текислаб, атрофига тупроқ сепиб, тўсиқча ясалади. Яна уяга йирик қум сепилса ҳам мақсадга мувофиқ бўлади. Бу қўрилган чоралар туяқуш тухумини босилишдан ва чакилишдан сақлайди. Бундай қурилмаларни ўзингизга маъқул келган ҳудуддан бир нечтаси ясалса мақсадга мувофиқ бўлади, чунки қушларда улар орасидан биттасини танлаб олиш имкони туғилади. Одатда бундай ҳолатларда туяқуш эркаги худди фермер тайёрлаган уяни танлайди ва шу уялардан бирида тухумлар пайдо бўла бошлайди.

Бир туяқуш эркагининг урғочилари бир ерга, умумий уяга тухум қўяди. Тухумда кундузи урғочиси ўтирса, кечасига эрка-

ги уни алмаштиради. Одатда, бир уяда 20-25 дона тухум бўлади. Лекин ҳамма тухумдан ҳам полапонлар очиб чиқмайди. Туяқуш тухуми қобиғининг ғоваксимон тузилиши ва кутикуласининг йўқлиги туфайли микробларга мойил бўлади. Шунинг учун нам иқлимли минтақада туяқуш полапонлари тухумдаги ривожланишни муртак босқичида 20 фоизгача нобуд бўлади. Албатта қум билан қопланган Африка саванналарида жазирама иссиқ, намлик миқдори паст бўлган табиий иқлим шароити тухумларни микроблар билан зарарланишига тўсқинлик қилади ва тухумдаги ривожланишнинг муртак босқичида полапонларнинг нобуд бўлиш ҳоллари кам учрайди.

Полапонлар соғлом тухумлардан аҳиллик билан бир неча кун ичида ёруғликка чиқади. Туяқуш жўжалари тухумдан ёруғ дунёни кўрадиган ва момиқ парли ҳолда очиб чиқади. Усти қуриб бўлгандан кейин ота-онасининг орқасидан югуриб юради ва мустақил равишда озиқланишни бошлайди. Жўжаларнинг ҳимоясини таъминlash – отасининг вазифасига киради.

■ | ТУЯҚУШЛАРНИНГ ТУХУМИНИ ТЕРИШ ВА САҚЛАШ



Туяқушчилик фермаси эгасининг энг асосий вазифаси табиий инкубацияга мўлжалланмаган, яъни ота-она туяқушлар босиб ётиши режалаштирилмаган тухумларни ўз вақтида териблиш. Сунъий инкубация учун янги қўйилган тухумларни териблиш мақсадга мувофиқ

бўлади. Тухум уяда қанча кўп ётса, унда касаллик қўзғатувчи бактериялар ривожланиш эҳтимоли шунча катта бўлади ёки тухумдаги муртакда вақтидан илгари ривожланиш жараёни бошланиши мумкин. Қуёшнинг кучли нурлари тўғридан-тўғри тухумга тушиши оқибатида тухум ичидаги муртак нобуд бўлиши мумкин. Бундан ташқари қўйилган тухумни уядан тез териб олиш, туяқушларни тухум қўйиш маҳсулдорлигини давом эттиришга мажбур этади, чунки йўқолган тухумнинг ўрнини қоплаш мақсадида она туяқушлар яна тезроқ тухум қўйиш ҳаракатига тушиб қолади.

Тухумларни уядан териб олиш учун ота-она туяқушларни ҳайдаб юбориш мумкин эмас. Биринчидан, туяқушлар хужум қилиши мумкин, иккинчидан, тухум олиш даврида туяқушларни стресслардан сақлаш лозим. Шунинг учун ота-она туяқушлар уядан узоқлашганда ва уларга уяда нима бўлаётгани кўринмайдиган пайт тухумлари териб олинади.

Териб олинган туяқуш тухумларини қутиларга тўмтоқ томонини юқорига қилиб олдиндан қуруқ латта билан артиб ва юмшоқ нарсага ўраб тахланади. Тухумлар ташиш вақтида силкиниш ёки урилишларда лат емаслиги учун қутиларга титраш, зириллаш, тебранишга қарши резина гиламчалар солинади. Агар тухумлар очиқ ҳолда ташилаётган бўлса, унда кути устига қуёш нури қайтариш ва тухумларни қизиби кетишдан сақлаш учун оқ рангга бўялган қопқоқ ёпилади.

Агар тухум ифлосланган бўлса, сақлаш хонасига қўйишдан олдин ювилади. Туяқуш тухумини ювиш учун тайёрланган сув илиқ, 40 даража атрофида бўлиши керак. Ушбу мақсадда совуқ сувни ишлатиш қатъиян ман этилади, чунки тухумнинг ичидаги моддалари киришиши оқибатида сув тухум ичига кириб кетади.

Тухумни ювиш олдидан қўлни дезинфекция қилиш ке-

рак. Сувга ҳам таркибида йод ёки хлор моддаси мавжуд бўлган дезинфекцияловчи модда солиш керак бўлади. Тухумни ифлосликлардан тозалаш жараёнида зинҳор куч ишлатиб тухум қобиғидан қириб ташлаб бўлмайди. Ҳар бир тухумни сувда 3 дақиқадан кўп ушлаб бўлмайди. Тухум ювиб бўлингандан кейин ҳавода қуритилади.

Туяқуш тухумларини инкубациядан олдин 10 кундан кўп бўлмаган муддатда сақлаш мумкин, энг мақбули 1 ҳафта. Бунда хона ҳарорати +15+18 даража ва нисбий намлиги 40 фоизни ташкил этиши керак. Инкубация учун сақланаётган тухумларни ҳар куни бир марта ағдариб туриш мақсадга мувофиқ бўлади. Агар доимий равишда тухумни ағдариб туришнинг иложи бўлмаса, унда сақлаш муддатида ҳеч бўлмаганда бир марта ағдариш керак бўлади.

Тухумнинг тўмтоқ томонини юқорига қилиб сақлаш мумкин, лекин ён томонга ётқизиб ҳам сақлаш мумкин. Агар берилган параметрлар бўйича нисбий намлик ва ҳароратни назорат қилиб туришнинг имкони бўлса, тухумни сақлаш учун совуткич (холодильник)дан фойдаланиш мумкин. Акс ҳолда термосдан фойдаланиш ёки совитиш учун муз пакетлардан фойдаланиш мумкин.

Тухумни инкубаторга қўйишдан олдин, уни албатта дезинфекция қилиш керак бўлади. Дезинфекция қилиш учун водород пероксиди ёки формальдегид пуркагич орқали сепилади.

Фермер туяқушларни кўпайтиришдан самарали фойдаланишни хоҳласа сунъий инкубациясиз юқори натижага эришиб бўлмайди. Инкубация яхши якунланиши учун фермадаги туяқушлар тухумининг тузилишидаги ўзига хос хусусиятларни билиш керак.

Одатда фермада тухумларнинг асосий қисми инкубация учун ишлатилади. Туяқуш тухумининг массаси тахминан

1,5 кг ни ташкил этади. Шунда тухум узунлиги 15-19 см ни, энига 13-15 см ни ташкил этади. Туяқуш тухумининг массаси урғочисининг танасига нисбатан 1 фоизни ташкил этади.

Ҳақиқатда туяқуш тухуми 1 кг дан 2 кг гача бўлади, лекин ўртача вазни 1,3-1,7 кг ни ташкил этади. Инкубация давом этиш муддати 42 кунни ташкил этади.

Инкубация қилишда тухум қобиғининг ғоваклилиги муҳим омиллардан ҳисобланади. Айниқса, тухумдан полапонларни чиқиш фоизини юқорилиги тухумнинг ғоваклилик даражасига боғлиқ бўлади. Бу кўрсаткич бўйин ранги ҳар хил бўлган кушларда фарқланади, шунинг учун ҳар хил туяқушларнинг тухумини инкубация қилишда ҳар хил нисбий намлик олинади. Чунки тухумнинг қуриши ва вазнини енгиллашиши нисбий намликка боғлиқ.

Африка туяқушининг тухуми оқ ёки сарғиш рангда бўлади, усти силлиқ ва ғовакли бўлади. Шу билан бирга шакли ва катта-кичиклиги билан фарқланади. Африка туяқушининг яқин қариндоши бўлган Эму Австралияда урчитилади ва ундан фарқли ўлароқ тухумлари кичикроқ вазни 600 граммгача бўлади, оч яшилсимон бўлиб, вақт ўтиб қораяди ва қобиғида катта миқдорда ғоваклар мавжуд бўлади. Яна килсизлилар вакили бўлмиш – Жанубий Америкада яшовчи Нандуни ҳам тухумини ўлчамини шундай, Эмуники билан бир, қобиғи силлиқ, ёрқин сариқ рангда, кейинчалик оқариб кетиш хусусияти бор.

Европа фермерлари ўстираётган Африка туяқуши тухуми 1,8 мм лик ўртача қалинликдаги қобиғи, 220 г оғирликда бўлади ҳамда ўта мустаҳкамлиги билан ажралиб туради, яъни 55 кг гача бўлган юкни бемалол кўтаради, солиштириш учун товук тухуми 3,5 кг гача бўлган юкни кўтаришини мисол келтириш мумкин.

Тухум қобиғи тагида мустаҳкам пардалар мавжуд. Ташқарисидагининг қалинлиги 0,12 мм, ичкарисидагининг қалинлиги 0,08 мм бўлади. Товуқ тухумларида тегишли равишда 0,06 мм ва 0,08 мм бўлади. Пардалар бевосита тухум қобиғига уланган ва унга қўшимча мустаҳкамлик беради. Туяқуш тухуми қобиғида кутикула умуман йўқ. Туяқуш тухумида ҳаво ўтказувчанлик товуқ тухумига нисбатан анча юқори. Бу хусусиятларини сунъий инкубация қилишда эътиборга олиш зарур.

Йирик тухумлар ортиқча вазн йўқотмаслиги учун паст нисбий намлик ва ҳаво ҳароратида инкубация қилинади. Бир хил ғовакли, икки хил вазни билан 1100 г ва 1800 г ли тухумлар бир хил шароитда инкубация охиригача биринчиси 165 г ва иккинчиси 270 г вазн йўқотади. Шунинг учун ҳар хил катталиқдаги тухумлар инкубация параметрларида керакли ўзгартиришлар қилиб, алоҳида-алоҳида шкафларда инкубация қилинади. Агар катта-кичик тухумлар бир инкубацион шкафда бир хил шароитда инкубация қилинса, ё катталари, ё кичиклари номувофиқ шароитда қолади. Йирик тухумлар намлик кам буғланиши оқибатида қизиб кетиши ва мос равишда намлик буғланиши оқибатида майда тухумлар қизиб кетмайди, аммо қуриб вазни камайиб, кичрайиб, енгил бўлиб қолади.

ИНКУБАТОР ТУЗИЛИШИ

Туяқуш тухумини инкубация қилиш учун бошқа паррандаларни инкубация қилиш мосламалари яроқсиз ҳисобланади. Уларда ҳарорат, намлик ва вентиляцияни тартибга солиш, шу билан бирга лотокларни автоматик тарзда ўз вақтида бурилишини талаб даражасида таъминлаш мумкин эмас.

Туяқушларни кўпайтириш бўйича Буюк Британия ва Италия давлатларидаги махсус инкубаторларни ишлаб чиқишни йўлга қўйган корхоналардан харид қилиб олиш мумкин.

Инкубацион шкафлар турли ўлчамда бўлиб, катта ва кичик тухумлар учун мос равишда керакли ҳажмда ясалган инкубаторлар харид қилиш керак бўлади. Инкубатор шкафларининг ҳар бир ўлчамидан биттадан эмас, иккитадан бўлса мақсадга мувофиқ бўлади. Кичик ҳажмдаги инкубаторларда режимни барқарор ушлаб туриш катталарига қараганда осонроқ бўлади. Бундан ташқари, тухум қўйиш камайиб қол-



ганда, фақат кичик ўлчамли инкубатор шкафларидан фойдаланса бўлади. Яъни бундай кичик ўлчамли инкубаторларнинг кўпроқ бўлиши мақсадга мувофиқ бўлади.

Инкубаторда инкубацион ва очириб чиқариш шкафлари алоҳида-алоҳида мавжуд бўлса, тухумнинг ривожланиши учун энг мақбул бўлган шароит бор ҳисобланади. Айниқса, бир вақтнинг ўзида тўлиқ тухум билан юкланганда юқори унумли бўлади.

Лекин амалда, туяқушлар галада бир нечта бошдан иборат бўлса, унда бошқача бўлади: тухумлар инкубаторга бирданига келмайди, аста-секин кела бошлайди. Натижада турли ривожланиш босқичидаги муртаклар бир хил шароитда бўлиб қолади. Бундай вазиятда тухумни жойлаштириш-ни турли усуллари мавжуд, лекин шкафдаги ҳаво алмашуви бир хил маромда бўлишига эътибор бериш керак.

Агар шкафга ҳар хил ёшдаги муртаклар биргаликда жойлаштирилган бўлса, 39-куни биринчи партияни очириб чиқариш шкафига ўтказилади. Муҳими тухумдан очиб чиққан туяқуш жўжаларини қолган тухумлар билан контактда бўлишига йўл қўймаслик керак, чунки тухумдан очиб чиқиш жараёнида чанг ва парларни кўпайиб кетиши кузатилади. Айниқса, гигиена қоидаларига риоя қилиш ўта муҳимдир, чунки инкубор шкафидан доимий равишда фойдаланиш, тўлиқ дезинфекция тадбирларини ўтказиш имконини бермайди.

■ ИНКУБАТОР ПАРАМЕТРЛАРИ

Юқорида таъкидлаганимиздек, туяқуш жўжаларини очириб чиқариш учун махсус инкубатор керак бўлади. Товуқ ёки ғоз жўжаларини очириб чиқадиган инкубатор туяқуш жўжаларини очириб чиқаришга ярамайди. Доимий равишда инкубаторга туяқуш тухумлари қўйилаётган бўлса, инкубацион шкафда ҳароратни $+36,0+36,5$ даражада доимий равишда ушлаш керак. Африка туяқуши тухумларига нисбий намлик 20-35 фоиздан кўп бўлмаслиги керак, Эму тухумига эса 32-44 даража бўлиши, Нанду тухуми учун – 23-35 фоиз бўлиши керак.

Агар тухумлар инкубаторга бир вақтда қўйилган бўлса, унинг ҳароратини биринчи беш кун 37,2 даражага кўтариш мумкин,

кейин 36,5 даражагача туширилади. Туякуш тухумлари иссиқлик сиғими юқори бўлганлиги туфайли инкубация даврининг охириги ҳафтасида ҳавога нисбатан тухум қобиғининг ҳарорати 2 даражага баланд бўлади. Шунинг учун инкубация охирида ҳаво ҳароратини озгина пасайтириш мумкин, чунки тухумлар ортиқча иссиқликни чиқариб ташлашга улгуриши ва қизиб кетмаслиги керак бўлади.

Инкубацион шкафларни ҳаво ҳарорати ва нисбий намликни бошқара оладиган хонада ўрнатиш кераклигини инобатга олиш зарур. Инкубаторлар ўрнатилган хона нисбий намлигини 40 фоиз, ҳароратини 21-25 даража ушлаб туриш керак. Инкубатор хонанинг параметрлари ўзгариши тўғрисида сигнал берувчи қурилма билан жиҳозлаш мақсадга мувофиқ бўлади.

Туякуш тухумининг инкубация даври 42 кун бўлгани учун шу даврда 12-14 фоиз вазнини йўқотиши мумкин. Ўртача кунига 0,3 фоиз вазн йўқотади. Бироқ бир хил шароитда ҳам тухум қобиғи ғоваклари ва қалинлигини фарқи ҳисобига 10 фоиздан 20 фоизгача вазн йўқотиши мумкин. Бунга йўл қўйиб бўлмайди, чунки бу икки ҳолатда ҳам тухумдан жўжа чиқиш кўрсаткичи пасаяди. Хусусан, 12 фоиздан кам тухум вазни йўқотилганда, тухумдан туякуш жўжаси чиқиши 78 фоизни, 14 фоиздан кўп тухум вазни йўқотилганда, тухумдан туякуш жўжаси чиқиши камайиб – 40 фоизни ташкил этади. Шу билан бирга тухум вазнини йўқотиши 12-14 фоизни ташкил этганда, тухумдан туякуш жўжасини чиқиши 92,9 фоизни ташкил этади. Тухум вазнининг йўқотилишини назорат қилиш учун, ҳар ҳафта уни мунтазам равишда тарозида тортиб туриш керак бўлади.

Одатга кўра, тухум сақланиш вақтида, инкубация шкафига қўйиш олдидан, 13-куни овоскопия вақтида ва 28-куни тарозида тортилади. Амалда тухум вазнини бундай ўлчаш тухумдаги йўқотилаётган вазн миқдорини назорат қилиб боришни таъ-

минлайди ва инкубация жараёнига керакли ўзгартиришлар киритиб бориш имконини беради. Агар тухум вазнини кўп йўқотаётган бўлса, нисбий намлик кўтарилади, кам йўқотаётган бўлса, нисбий намлик туширилади. Агар тухумларни маълум қисмида ўзгаришлар қайд этилган бўлса, унда уларни яхшиси кичик инкубатор шкафига ўтказиб, улар учун алоҳида шароитлар яратилади ва назоратга олинади.

Туяқуш муртаклари (эмбрион) ривожланиш жараёнида катта миқдорда кислородга муҳтож бўлиши маълум. Кислородга бўлган талаб инкубация жараёнида кун сайин ошиб боради ва ривожланишнинг 38-куни максимал даражага етади. Шунинг учун инкубацион залда ва инкубацион шкафда ҳаво алмашинуви интенсив равишда олиб борилиши керак.

Инкубаторга тухумлар узлуксиз равишда қўйилаётган шароитда 1 кг тухум учун 1 дақиқада инкубатор шкафига 0,2-0,3 литр ҳаво бериб турилади. Лекин инкубация даврининг охирига бориб бу параметр 0,545 литрни ташкил этади. Туяқуш жўжаларини тухумдан очиб чиқариш вақтида ушбу параметрни 8 баробаргача инкубация учун кўтариш зарур бўлади.

Тухумлар ҳаво камералари юқорига этиб, вертикал ҳолатда жойлаштирилади. Туяқушчилик билан шуғулланувчи кўпчилик фермерлар худди шундай қилишади ва шу билан бирга горизонтал ҳолатда тухумни инкубацияга қўювчилар ҳам бор. Вертикал ҳолатда жойлаштирилган тухумлардан полапонлар осон очиб чиқишади ва муртакни ривожланиши яхши кечади. Лекин кўз билан тухумнинг ҳаво камераси қайси томонида жойлашганлигини аниқ кўриш қийин. Буни овоскопия қилиш орқали аниқлаш мумкин.

Инкубацион лотоклардаги тухумларни пардаси қобиғи билан қўшилиб ўсиб кетмаслиги ва иссиқликнинг бир текис тақсимланиши учун муртак ривожланишини 39-кунига-

ча мунтазам равишда айлантрилиб турилади. Тухумни вертикал бўйича 45 °C ён томонга айлантрилади, бир кунда 2 мартадан 24 мартагача айлантриш қайтариб турилади. Африка туякушини тухуми 39-куни очириб чиқариш шкафига ўтказилади ва ён бошлаб ётқизиб тахланади. Эму муртагининг ривожланиши 50-52 куннинг ташкил этади, Нандуники эса – 32-38 кунни ташкил этади. Шунинг учун инкубацион тадбирлар (бажариладиган ишлар) мос равишда сурилади.

■ | ТУЯКУШ ЖЎЖАЛАРИНИНГ ДУНЁГА КЕЛИШИ



Туякуш жўжаларини дунёга келиш жараёни товук жўжалариникидан катта фарқ қилади. Туякуш жўжаси тухумнинг қисқа ўзаги бўйича жойлашиб олиб, оқсил моддасидан таркиб топган пардани ҳаво камерасига иложи борица яқинроқ жойидан тумшуғи ёрдамида ишқалаб тешади. Бу ҳаводан биринчи нафас олиш имконини беради. Кейин туякуш жўжаси бошини орқага ташлайди ва тухум қобиғини оёқлари билан тиралиб синдиради. Тухумнинг қобиғида узунасига ёриқлар пайдо бўлади.

Тухум қобиғида ёрилган жойи пайдо бўлгунича туякуш жўжаси 90° га айланади, товук жўжаси эса 270° га айланади, ана шу айланиш жараёнида тухум қобиғининг турли жойида озгинадан ёриқлар пайдо қилади, кейин чиқиб кетиш учун

тепа қисмини улоқтириб юборади.

Биринчи туяқуш жўжалари тухумни чўқиб тешишни бошлаганда, инкубатордаги нисбий намлик сатҳи 30 фоизга оширилади. Агар инкубацион шкафга тухумлар тўлиқ қўйилган бўлса, ҳарорат ярим даражага камайтирилади, агар тухум сони кам бўлса, ҳарорат шунчага кўтарилади. Туяқуш жўжалари тухумни ёриб чиқишни бошлаганда, намлик 50-60 фоизгача кўтарилади. Бу полапонларни тухумдан ёриб чиқиш жараёнига ёрдам беради.

Агар тухумдан ёриб чиқиш жараёнида туяқуш жўжалари қийналаётган бўлса ҳам дарров ёрдам бериш тавсия этилмайди. Айниқса, бу туяқуш жўжаси ҳали тухум пардасини ёриб чиқмаган ва нафас олишни бошламаган бўлса. Киндик томирлари ҳали ёпилмаган ва қон билан тўла бўлса, полапон ёриб чиқишга тайёр бўлмайди. Лекин бошқа пайт бошқа ҳодиса ҳам бўлиши мумкин, масалан, тухумни ёриб чиқиш вақтида туяқуш жўжасини нотўғри ётиши. Бундай полапонга ёрдам бериш керак бўлади, факт тухум ёриғини олиб ташлаш орқали, қолган жараённи ўзи давом этади.

Фермер, албатта, ҳамма очиб чиқаётган туяқуш жўжаларига ёрдам бериб, уларни сақлаб қолишни хоҳлайди. Лекин нимжон, кучсиз туяқуш жўжаси бутун галани кучсизлантиради. Агар туяқуш жўжасида тухумдан чиқиш жараёнида қийинчиликлар пайдо бўлдим, кейинчалик ҳам ривожланиши тенгдошларидан орқада қолиш эҳтимоли мавжуд. Шунинг учун бундай туяқуш жўжаларига тухумдан чиқиш жараёнида ёрдам бериб, кейинчалик наслга эмас, фақат гўштга боқишни режалаштириш керак.

Янги очиб чиққан полапонлар учун “брудер” деб номланадиган махсус мослама мавжуд. Брудер – лампалар ёрдамида иситиладиган катта бўлмаган таглик катақдир.

Уни инкубацион залга жойлаштириш мумкин. Туяқуш жўжаларини тухумдан чиққандан кейин 2-3 соатга брудер тагига усти қуригунча қўйилса, мақсадга мувофиқ бўлади.

Тухумдан чиққан туяқуш жўжаларига қарашни вазнини тортишдан бошланади. Қушнинг вазнини билиб олганимиздан кейин унинг ривожланишини кузатиш осон бўлади. Туяқуш жўжасини нормадаги вазни 500 дан 900 г гача бўлади. Таққослаш учун инкубацион даврининг ўртасида туяқуш муртаги бор йўғи 10 г ни ташкил этади, ўсиш суратини тезлиги инкубацион даврининг ўзида ҳайратга солади.

Янги очиб чиққан полапоннинг киндигига дарҳол дезинфекцияловчи восита билан ишлов берилиши керак. Биринчи кунлари туяқуш жўжалари киндигига дезинфекцияловчи восита билан ишлов бериш бир кунда бир неча марта қайтарилиб турилади.

ИНКУБАЦИЯ ЖАРАЁНИДАГИ НОСОЗЛИКЛАР

Қулай ҳолатда туяқуш тухумларининг уруғланиши 80 фоизни, лекин амалда кўпинча 65-75 фоизни ташкил этади. Ҳаётда умуман тухумларни уруғланганлик фоизи 50 дан 95 фоизгача бўлиши мумкин.

Тухумларнинг уруғланганлик фоизи паст бўлиши сабаблари турлича бўлиши мумкин. Агар галада эркаги кўп бўлса, унда урғочисини оталантиришда доимий равишда бир-бирига ҳалакит беради. Ёки галада эркаги етарли миқдорда бўлмаса, унда улар ўз вазифасини тўлиқ адо эта олмайди. Туяқушларнинг эркаги жуда қари бўлиши, уни уруғлантиришга кучи етмаётганлиги туфайли наслдор ёш эркаги билан алмаштиришга эҳтиёж сезилаётгани бўлиши мумкин. Яна тухумларни кам уруғланганлик

сабаби нотўғри озиклантириш, зич жойлаштириш, касалланиш ва гинекологик тўлиқ ривожланмаган ҳам бўлиши мумкин. Мавсумий тухум уруғланиш сифати пасайиши ҳам мумкинлигини эсдан чиқариш керак эмас, бу нормал ҳолат ҳисобланади.

Лекин, уруғланган тухумда муртак яхши ривожланмайдиган ҳолатлар ҳам бўлади. Бу ҳолатда тухумлар қаттиқ совуқ ёки иссиқ шароитида сақланганлиги оқибатида шикастланади, яъни совуқ ёки иссиқ уради. Яна бундай ҳолатлар тухумни муддатидан ортиқ сақлаш ёки инкубациядан олдин қилинган сифатсиз дезинфекция оқибати бўлиши мумкин.

Туяқуш тухумининг инкубацион сифатини ёмонлашиши, товуқларда учрайдиган ҳолатларда ҳам бўлиши мумкин. Бу катта ёшдаги туяқушларни нотўғри озиклантириш, муртакнинг тухум ичида нотўғри жойлашиши, тухум қобиғи сифатсиз бўлиши ва бошқалар.

Агар инкубация даврини охирида муртак nobуд бўлган бўлса, унда инкубатордаги ҳарорат ва намлик режими бузилганлигини, тухум массаси йўқотилиши ёки кўпайиши оқибатида nobуд бўлганлигига гувоҳ бўлишимиз мумкин. Яна бир сабабларидан – ҳаво алмашинуви бузилиши туфайли кислород етишмаслиги оқибатида муртак nobуд бўлади.

ОВОСКОПИЯ ҚИЛИШ

Овоскопия қилиш – махсус асбоб бўлиб, тухум муртаги ривожланишини назорат қилиб бориш мақсадида ёруғлик нури орқали кўриш ва уруғланмаган тухумларни аниқлаб, ўз вақтида чиқариб ташлаш имконини беради.

Туяқуш тухумини текшириш учун мўлжалланган овоскоп, оддий товуқ, ўрдак тухумларини текширувчи овоскопдан ўл-

чами билан фарқ қилади. Бу тахминан 1 метр узунликдаги труба, энига тухумнинг ўлчамига тенг, тухумни механик тарзда шикастламаслиги учун чети резина билан қопланган бўлади. Труба ичининг пастки қисмида қуввати энг ками 100 Вт лик лампа ўрнатилади.

Туякуш тухумини кўриш учун овоскопни катта маблағ сарфлаб олиш шарт эмас, унинг тузилиши оддий бўлгани учун ўзингиз ҳам яасангиз бўлаверади.

Одатга кўра инкубацияни 7-куни овоскопда кўрилганда ичида муртакнинг пардаси – аллантоис аранг кўринади, қайсики тухум қобиғини 20 фоизини қоплайди. 14-куни парда анча сезиларли бўлиб қолган бўлади ва ўсишда давом этиб, тухум қобиғи тепа қисмини ҳаммасини бутунлай қоплайди. 24-куни тухумнинг олтидан бир қисми ҳаво камераси билан банд бўлади. Муртак бу вақтда тухумнинг ярмини эгаллайди. 33-куни тухумнинг жами ҳажмидан учдан икки қисмини эгаллайди. 35-кунидан бошлаб овоскоп ёрдамида фақат ҳаво камерасини кўриш мумкин, чунки қолган барча қисмини бутунлай муртак эгаллайди.

Қоидаги кўра бутун инкубация давомида тухумни икки марта: 13 ва 20-кунлари овоскопия қилинади. Лекин ҳар ҳафта 39-кунигача, яъни тухумларни очириб чиқариш шкафига ўтказгунча овоскопия ўтказиш мумкин. Тухумларни очириб чиқариш шкафида овоскопия қилиш ҳар 6 соатда ўтказилади.

Тухумларни овоскопда кўриш жараёнида санитария-гигиена талабларга риоя қилиш лозим. Тухумни овоскопда кўриб бўлгандан сўнг кейинги тухумни қўйишдан олдин тухум теккан резина айлана дезинфекцияловчи моддага шимдирилган губка (латта) билан артилади.

■ I ТУЯҚУШ ЖЎЖАЛАРИНИ ПАРВАРИШЛАШ

Туяқуш жўжалари парваришlash шароитига таъсирчан бўлади. Хонадаги ёруғлик сатҳи, ҳарорат ўзгариши ва ҳаво ал-машинуви туяқуш жўжаларини боқишда катта аҳамият касб этади. Айниқса, биринчи ярим йилликда боқиш хавфли, кейин ёш туяқушлар чиниқиб, бақувватлашади ва атроф-муҳит таъсиридан алоҳида эътиборга муҳтож бўлмайди.

Ёш туяқушларни биринчи йили сақланганлик кўрсаткичи 70-80 фоизни ташкил этади. Лекин биринчи ҳафта парваришlash шароитида озгина ўзгариш бўлса ҳам 50 фоизи нобуд бўлишига олиб келади. Энг яхшиси ёзда чиққан туяқуш жўжаларини қараш осонроқ, қишда чиққанларини нобуд бўлишни камайтириш учун анча диққат билан парвариш қилиш керак бўлади.

Туяқуш жўжалари тухумдан чиқиши билан 20 см лик тўсиқ ичига қўйилади. Туяқуш жўжалари 150-180 см гача етгунча кунига 1 см дан жуда тез ўсишни бошлайди. Лекин биринчи ҳафта бошланғич вазнининг 10 фоизини йўқотади, кейин эса вазн қўшишни бошлайди.

Кўпинча туяқуш жўжаси тухумни очиб чиққандан кейин биринчи 6-8 кун ичида озуқа ва сувга муҳтож бўлмайди. Бундан ташқари бу даврда озуқа бериш ва сув ичириш мақбул бўлмайди, чунки тухум сариғи қолдиғи организм томонидан тўлиқ ўзлаштирилиши керак ҳамда мускуллари орасидаги ортиқча сув ҳам сўрилиб кетиши даркор. Туяқуш жўжалари учун бундай ҳафталик очлик табиий ҳолат бўлганлиги учун бу даврни енгил ўтказади. Асосийси, бу даврда ҳар қандай зарарли таъсирлардан, хусусан елвизакдан сақлаш керак бўлади. Янги тухумдан



чиққан туякуш жўжаларини, албатта, иситиладиган хонада сақлаш керак.

Табиий шароитда туякуш жўжалари мустақил равишда катта ёшдаги туякушлар гўнгини чўқий бошлайди. Ундан клетчаткани ҳазм қилишда ва иммунитетни ривожланти-

ришда ёрдам берувчи фойдали микроорганизмларни олади, шу билан бирга, у ердан туякуш жўжаларига ҳалокатли таъсир этувчи гижжа тухумларини ҳам юқтириш мумкин.

Кичкина туякушчалар дастлаб оқсил моддасига бой бўлган майдаланган беда билан боқилади. Кўпинча кичкинтойлар катталари чўқиб ейишини кўриб муаммосиз чўқиб ейишни бошлайди. Грануллиланган ем бошида полга сепиб берилади, улар мустақил ейишни бошлагандан кейин емдонларга солинади.

Озиқага ўргатиш вақтида муаммо туғилса, оддий усулни қўллаш мумкин. Яхши пиширилган тухумни майда қилиб тўғраб, полга сепилади ва шу ерга қалам ёки бармоқ билан ерга тўқиллатиб уришни такрорлаб туради. Бунини бир кунда бир неча марта такрорлаб турилса мақсадга мувофиқ бўлади. Ёш туякушчалар 2-3 кундан кейин ўзлари мустақил равишда озуқани чўқиб ейишни бошлайди.

Хона полига йирик қум солинган бўлса, у ерда ёш туякушларни боқиб бўлмайди, чунки қумни озуқа ўрнига қабул қилиб кўп миқдорда истеъмол қилиши мумкин, натижада ошқозонда тўпланиб, ҳазм қилиш жараёнига ҳалақит беради.

Ёш жўжаларни 3 ойга тўлганидан кейин сайр майдончасига чиқариш мумкин бўлади. Лекин, сайр майдончасида шийпон, унинг тагида емдон ва нам ҳавода ёш туякушлар устини қури-

тиш учун иситкич ўрнатиш керак.

Агар ёш туяқушлар катта ёшдагилардан алоҳида боқилаётган бўлса, ҳаво иссиқ кунлари бедапояда уларни сайр қилдириб ўтлатиш мақсадга мувофиқ. Одатда ёш туяқушларни яйловда ўтлатиш осон, улар ходимларга ўрганиб қолади ва ўз ота-оналарининг орқасидан эргашиб юргандек улар орқасидан юради. Қиш мавсумида турли ўтлардан таркиб топган пичан билан боқилади.

Туяқушларни гўшт (бўрдоқи)га боқишга ўтказилганда металл сеткадан тўсиқ қилинган сайр майдонида жойлаштирилади. Бу усулда боқилганда сайр майдони 1 бошга 3 м² ва хонада 1 бошга 1 м² ер майдони ҳисобидан жойлаштирилади. Ёш туяқушлар 8-10 ҳафта боқилгандан кейин бўрдоқига боқиш майдонида ўтказилади ва бу ерда 40 ҳафталиккача боқилади. Ёзда тухумдан чиққан ёш туяқушларни 5-6 ҳафталик ёшидан бўрдоқига боқиш рационига ўтказиш ва баҳорги ёки кузги ёш туяқушларни фақат 6-7 ҳафталик ёшидан бўрдоқига боқиш рационига ўтказиш мумкин бўлади.

Ёш туяқушларни 10 ҳафталикдан сўйиш мумкин. Сўйиш учун бўрдоқига боқилаётган ҳар бир ёш туяқушнинг тирик вазни 110-120 кг бўлиши керак. Ёз фаслида ёш туяқушлар бундай кўрсаткичга 8-9 ҳафталигида, қиш фаслида эса 11-12 ҳафталигида эришади.

ТУЯҚУШЛАР КАСАЛЛИКЛАРИ

Катта ёшдаги туяқушлар организми бақувват ва эпидемияга қарши чидамли бўлишига қарамай, барибир фермерга паррандалар касалликларидан тўлиқ ҳоли бўлиш имкони йўқ. Катта ёшдаги туяқушлар инфекцияга чидамли бўлади, лекин

ошқозон-ичак фаолияти ва нафас олиш тизими ишини бузилиши, респиратор вируслар билан зарарланишга мойиллиги мавжуд.

Грануллиланган озуқа йирик фракциядан иборат бўлиб, меъда-ичак тизимини ишини издан чиқаради, шу билан бирга, майда қилиб тайёрланган концентратларнинг чангсимон қисмлари ҳам қушнинг бурун тешигига кириб қолиб нафас олиш системасида муаммолар келтириб чиқаради.

Юқумли касалликлардан сақлашда туяқушлар бошқа паррандаларга ўхшаб энг кўп тарқалган хавфли юқумли касалликларга қарши эмланиши шарт. Эпидемия тарқалишига қарши хоналарни тоза тутиш керак ва ўз вақтида дезинфекция тadbирларини ўтказиб туриш керак.

Ўй паррандаларида учрайдиган энг кўп тарқалган касалликлар, уларнинг симптомлари, профилактикаси ва даволаш усуллари.

Парранда гриппи

Туяқушлар ҳам бошқа қушлар сингари парранда гриппи (вирус касаллиги) билан касалланади. Бу касалликка мойиллиги кўп жиҳатдан чегараланган майдонда парранда зичлиги, бошқа юқумли касалликларни мавжудлиги ва туяқушнинг ёшига боғлиқ.

Парранда гриппида кўпинча кўзидан суюқлик оқиши ва ҳаво қопчаларини шамоллаши – аэросаккулит кузатилади. Вирус билан зарарланган паррандани иштаҳаси йўқолади ва сийдиги яшилсимон тус олади. Аниқ ташхис лаборатория тестлари орқали қўйилади.

Микоплазмоз

Микоплазма – замбуруғ қўзғатувчи инфекция. Бошқа қуш-

ларга қараганда, туяқушларда учрайдиган замбуруғ инфекци-
ясидан анча фарқ қилади. Туяқушларда синусит, ринотрахеит
ёки қўз инфекцияси билан зарарланган вақтда замбуруғ касал-
лиги ҳам қўзғаши мумкин. Бу касалликни дастлабки босқичда
даволаса муаммо туғдирмай тезда тузалади, лекин ўтказиб
юборилган ҳолларда сурункали формасига ўтиши мумкин.

Нафас йўллари касаллиги

Туяқушлар нафақат қимматбаҳо қишлоқ хўжалик маҳсулот-
лари беради, балки ўз ҳаётида зарарли моддалар ҳам ишлаб
чиқаради. Хусусан, ёпиқ хонада туяқушлар гўнгидан катта миқ-
дорда аммиак ажралиб чиқади, бунинг оқибатида ўзларида
нафас йўллари касалликлари ривожланиши мумкин. Аммиак,
оғир газ бўлгани учун пастда, полнинг устида йиғилади. Уйку
вақтида туяқушлар узун бўйнини пастга тушириб бошини ерга
қўяди, шу билан бирга аммиак буғларидан нафас олади. Ам-
миакни борлигини билиш учун бурун орқали ҳидлаш билан
аниқлаш мумкин. Агар амиакка хос ўткир ҳид бўлса, унда қуш-
лар аммиак билан ифлосланган ҳаводан ҳар куни нафас олиб
аста-секин заҳарланиши мумкин. Бунинг олдини олиш учун
хона яхшилаб шамоллатиб турилиши керак, лекин елвизак бў-
лиши мумкин эмас. Хонани вақтида тозалаб, ветеринария са-
нитария талабларига риоя қилиш керак. Туяқушларни боқишда
хона полини кўтариш тавсия этилади. Тўшамага аммиак ажра-
либ чиқмаслиги учун махсус қўшимча қўшилади.

Амиакдан ташқари ҳаводаги майда чанглар, юқори намлик
ёки елвизак мавжудлиги ҳам нафас йўллари касаллигини чақи-
ради.

Нафас олиш йўлларидаги бегона предмет

Туяқушларнинг трахеяси оғзига яқин жойлашганлиги учун

ютиш жараёнида у ерга бегона предметларни тушиб қолиши кўп кузатилади. Айниқса, озукланиш вақтида чангсимон қисмларни трахеяга тушиб қолиш эҳтимоли юқори.

Соғлом туякушлар тез ва катта иштаҳа билан озиқланади, шунинг учун кўпинча озукани майда фракцияларини нафас билан трахеясига тортиб олади. Бунинг олдини олиш учун грануланган озукалардан фойдаланилади.

Бироқ туякуш трахеясига ёки қизилўнгачига йирик предметни кириб қолиши ҳам зарар етказиши мумкин. Айрим ҳолларда кушлар ҳаво етишмаслигидан азоб чекишлари мумкин. Туякуш топган арқонини қисман ютиб юбориши мумкин. Кейин ундан халос бўлиш ниятида ўзини у ёқдан-бу ёққа уришни бошлайди, арқоннинг бўш томонига ўралиб бўғилиб қолиши ёки ўзини бошқа бир йўл билан жароҳатлаши мумкин.

Шундай нохуш ҳолатлар бўлмаслиги учун озиқани қатъий равишда бир хил фракцияли (катталиқда) қилиб берилади ва паррандахонада бегона предметлар бўлмаслиги устидан назорат ўрнатилади.

Стаз (камҳаракатлилиқ)

Стазда туякуш бўшашган, лоҳас бўлади ва иштаҳа йўқолади, кейинчалик озукани умуман рад этади. Одатда камҳаракатлиқнинг сабаби бирор бир касаллик бўлади, уни аниқлаб даволаш чоралари кўрилади. Туякуш соғайишни бошлаганда, стаз симптомлари ўзи йўқ бўлиб кетади.

Замбуруғли гастрит

Туякушлар кўпинча ошқозонига замбуруғ инфекцияси тушиши оқибатида азоб чекади. Замбуруғ билан зарарланган озуканинг, айрим ҳолларда бегона предметнинг ошқозонга тушиши оқибатида бу касаллик ривожланади. Ошқозонда замбу-

руғли гастрит ривожланишининг олдини олиш учун озуқа сифатига эътибор бериш керак бўлади.

Гижжалар

Фермерлар уй ҳайвонларини ясси қуртлардан муваффақиятли ҳимоя қилмоқдалар. Янги келтирилган туяқушларнинг аваламбор, гўнгини гижжага текширтириш учун лабораторияга топшириш керак. Асосийси, гижжани ўз вақтида аниқлаб, доволаш ва бошқа соғлом туяқушларга тарқаб кетишининг олдини олиш учун мунтазам равишда галадаги барча қушларнинг гўнгини анализ қилдириб туриш керак.

Бактериал энтерит

Некрозли энтерит сальмонеллэз ёки бошқа патоген микроорганизмларни юкишига олиб келади. Одатда патоген микроорганизмларнинг ичакларда ривожланишини ясси гижжа – паразитларга қарши берилган дорилар провокация қилиб қўзғатади. Яна турли вирусли инфекциялар ва ҳатто янги ўрилган бедани ортиқча бериб юбориш ҳам бактериал энтеритни чақириши мумкин.

Бошқа кўп касалликларга ўхшаб, туяқушларни ноқулай шароитда боқиш ҳам бактериал энтеритни келтириб чиқариши мумкин. Бу туяқушларни жуда зич жойлаштириш, ветеринария-санитария қоидаларига риоя қилмаслик, инфекциянинг кўплиги ва стресс ҳолатлардир.

Паразитар энтерит

Туяқушларни ривожланишига ҳалақит берувчи гижжалар – ясси қуртлардан ташқари бошқа паразитлар ҳам мавжуд.

Туяқушларнинг ингичка ичагида ва клоакасида криптоспоридиум жойлашиши мумкин. Йўғон ичагида ёки аппен-

доксида балантидиум коли паразити ўзига бошпана қилиб олиши мумкин, улар организмга кўп нохушликларни келтириши мумкин, айниқса, патоген микроорганизмлар иштирокида. Туяқуш жигари, буйраги ва ошқозон ости безлари ҳам паразитлар билан зарарланиши мумкин.

Ньюкасл касаллиги (псевдочума)

Ньюкасл касаллиги – энг кўп тарқалган ва ўта хавфли вирус касаллиги бўлиб, туяқушларга кўпинча уй паррандаларидан, хусусан, товуклардан юқади. Бироқ туяқушлар орасида касаллик товукларга қараганда, ҳам тезлик билан тарқалади, чунки улар бу касалликка жуда сезгир бўлади. Лекин Ньюкасл касаллиги туяқушларнинг 9 ойлик ёшигача бўлган даври учун ўта хавфли ҳисобланади.

Бу касалликнинг туяқушлардаги симптоми қуйидагича: умумий ҳолсизлик (бемадорлик), координацияни бузилиши, бошини орқага ташлаш ҳоллари. Одатда касаллик ўлим билан тугайди. Юқоридаги симптомлар билан туяқуш нобуд бўлса, псевдочума касаллиги вирусини ажратиб олиш учун намуна ҳайвонларни ташхиси марказига жўнатилади.

Энцефалопатия

Энцефалопатия касаллигининг белгилари Ньюкасл касаллигининг белгиларига ўхшаб кетади. Бу бош миёда ўткир кечувчи инфекцион касаллик. Афсуски, энцефалопатияни чақирувчи вирус касаллиги табиати кам ўрганилган бўлиб, келиб чиқиши аниқланмаган.

Касалликнинг асосий белгилари қушларнинг координацияси ва нафас олиш ҳаракатлари бузилиши, кўпинча, тана ҳарорати кўтарилиши ва оёқларининг ҳолсизланиши ва уй-куга тортиши кузатилади.

Бу касалликни даволашда красавка (белладонна) дам-ламаси яхши таъсир этади.

Заҳарланиш

Заҳарланиш натижасида туяқушларда одатда турли хил неврологик симптомлар пайдо бўла бошлайди. Туяқушларда заҳарланиш касаллигини чақирувчи заҳарли моддалар етарли даражада кўп, масалан: пестицидлар, оғир металллар тузи, кўк озиқаларни етиштиришда фойдаланадиган нитритлар ва бошқалар.

Паррандачиликда одатда антибиотиклар қўлланилади, уй товукларини ривожлантиришда саноат масштабида ишлатилади. Бундай препаратлар туяқушларнинг заҳарланишига олиб келади.

Заҳарланишда гумон қилинганда, аниқ ташхис қўйиш учун лабораторияда заҳарли моддани аниқлаш бўйича текширилади ва натижасига қараб даволаниш курси тайинланади.

Деформация ва синишлар

Тахминан туяқушларнинг 5 фоизи оёғини деформациясидан азоб чекишади. Деформациянинг икки хили учрайди: **“пайларнинг чўзилиши”** – нотўғри озиқланиш натижасида келиб чиқадиган касаллик, ва **“оёқларнинг буралиши”** – келиб чиқиш табиати аниқланмаган касаллик.

Ёш туяқушларнинг суякларни ўсиш доираси юқори бўлганлиги учун улар тез-тез жароҳат олиб туриш натижасида суяклар синиши учраб туради. Лекин, суякларни тез-тез синиб туриши қушларнинг рационада айрим моддаларнинг етишмаслиги ёки парвариш қилиш шароитлари тўғри келмаслиги оқибатида бўлиши мумкин.

Гипогликемия

Гипогликемия туяқушларда кўпинча узоқ муддат оч юрганлик оқибатида пайдо бўлади. Касаллик қонда шакар моддасини камайиб кетиши натижасида вужудга келади. Симптомлари Ньюкасл касаллигига ўхшаб кетади.

Глюкозани туяқушнинг томирига юборганда тез ва муаммосиз тузалиб кетади.

Парранда чечаги (оспа)

Ҳашаротларда парранда чечаги енгил ўтади ва асосан улар орқали қушларга тарқалади. Туяқуш фермаларида ушбу касалликни охирги пайтлари тез-тез пайдо бўлиши кузатилмоқда, айниқса, ҳашаротларнинг кузга яқин кўпайиши даврида.

Чечак касаллигининг клиник белгилари – терисининг турли ерларида ва шиллиқ пардаларида сўгалсимон ўсимталар пайдо бўлади. Туяқушларда кўпинча кўз ва тумшуғи атрофида кўриш мумкин. Чечак касаллиги билан зарарлангандан кейин уларда кўрлик аломатлари ривожланади.

Чечак касаллигига қарши вакцинаси мавжуд бўлса ҳам давоси кўпинча муваффақиятсиз бўлади. Айрим ҳолларда чечак билан касалланган қушлар кўр бўлиб қолгандан кейин озуқани етарли даражада топиб истеъмол қила олмаганлиги сабабли ориқлаб, озиб кетиши оқибатида nobуд бўлади.

Чечакка қарши вакцина уй товукларига касаллик юқинининг олдини олиш мақсадида ишлаб чиқилган бу вакцинани туяқушларга ҳам қўлласа бўлади.

Инфекцион дерматопатлар

Инфекцион дерматопатлар – туяқушларни ривожлантиришда етарли даражада тарқалган муаммо ҳисобланади.

Одатда бу касаллик туяқушларни ортиқча озиқлантириш оқибатида келиб чиқади.

Худди парранда чечагидек, терини зарарланишини кўз атрофида кўриш мумкин. Лекин, бу зарарланган тери қисминини қайси касалликка тегишлилигини аниқлаш қийинчилик туғдирмайди. Инфекцион дерматопатда тери устида йўғонлашган пўстлоқ пайдо бўлади. Шунга ўхшаш терида ўзгаришлар пайдо бўлиши мувозанатланмаган озиқланишдан ҳам бўлиши мумкин, лекин бунда терининг бошқа қисмларида ҳам ўзгаришларни учратиш мумкин. Инфекцион дерматопатияда фақат кўз атрофида ўзгаришлар пайдо бўлади. Бу касалликни замбуруғларга қарши препаратлар ёрдамида муваффақият билан самарали даволаш мумкин бўлади.

Тери паразитлари

Туяқушларда кўпинча пат канаси (жўлак, клещ) ва битлари учрайди, гарчи битлар уларда камдан-кам учрайди. Пат канаси туяқуш патларига жуда катта шикаст етказиши, шунинг учун фермалар вақти-вақти билан касалликни олдини олиш мақсадида эктопаразитларга қарши махсус препаратлар ёрдамида тадбирлар ўтказилиб турилади.

Бундан ташқари, туяқушларда капанинг пат капасидан бошқа турлари ҳам бўлади. Кана томонидан терини чақиш орқали, терини жароҳатлайди, натижада тери сифати ёмонлашади ва энг ёмони локал фалажлик (паралич)ни келтириб чиқаради. Бундай ҳолатда, албатта, теридан ёпишиб олган паразитни суғуриб олиш керак, шундан кейин маълум вақт ўтгандан кейин фалаж ўтиб кетади.

I ТУЯҚУШ ҒЎШТИ



Туяқуш ғўшти қизил рангда, мазаси янги сўйилган бузоқ ғўштини эслатади. Дегустация (татиб кўриб синаш, фарқлаш, сифатини аниқлаш) натижасига кўра ғўштини таъмини сифати бўйича мол ғўшти филесидан озгина фарқ қилади.

Яқин вақтларгача энг парҳез ғўшт деб курка ғўшти ҳисобланган, лекин ҳозирги вақтда диетологлар томонидан энг парҳез ғўшт деб туяқуш ғўшти тан олинган.

Туяқуш ғўшти таркибида холестерин моддасини мавжудлиги бўйича охириги тадқиқотлар шуни кўрсатадики, балиқ ғўшти, хусусан форель балиғи ғўшти билан кўрсаткичлари бир хилдир.

Туяқуш ғўштида протеин катта миқдорда мавжуд, лекин ёғ жуда кам миқдорда бўлади. Туяқушнинг нимталанмаган ғўшти тирик вазнига нисбатан 60 фоизни ташкил этади. Туяқуш ғўштининг умумий ҳажмидан 62 фоизи тоза лаҳм ғўшт, 27 фоизи суяқлар ва қолгани ёғни ташкил этади. Бир туяқуш-

дан 40 кг тоза гўшт олиш мумкин ва асосий қисмини бақувват оёқ сон гўшти ташкил қилади.

Урғочи чўчка ҳар йили 2,5 тонна атрофида гўшт берадиган бўлса, урғочи туяқушдан йилига ҳақиқатда 4 тоннагача гўшт олиш мумкин. Бу ерда бўрдоқига боқилган чўчка болаларидан сифатли чўчка гўшти олиш учун нархи қиммат бўлган ем концентратлар сотиб олиш керак бўлади. Туяқушчиликда эса жуда арзон тушадиган туяқушларни оёқ остидаги озиқа (яйлов, ўтлоқ) ва пичан билан боқиш кифоя этади.

Шундай қилиб, туяқуш гўшти етиштиришнинг таннархи курка гўштини етиштириш таннархидан баланд эмас, лекин курка боқишга қараганда, туяқуш боқишдан катта фойда олса бўлади.

■ | ТУЯҚУШ ТЕРИСИ



Туяқуш терисига азалдан модельерлар (кийимларнинг моделини ишлаб чиқувчи мутахассис) орасида талаб катта бўлиб келган, чунки туяқуш териси ошлангандан кейин илон

ва тимсоҳ териларидан сифати бўйича озгина юқори туради. Туяқуш терисидан жуда юпқа, лекин ҳаддан ташқари мустаҳкам ва эгилувчан чарм (тери) ясалган ва галантереяда сумка, чарм ҳамён, камар, тасмалар ишлаб чиқаришда ишлатилади.

Бундан ташқари, туяқуш териси чармидан жуда пишиқ кийим ва оёқ кийимлар тикилади. Бир бош туяқуш терисидан 3 жуфт сифатли чарм оёқ кийими тикиш мумкин.

Туяқуш териси юзида ўзига хос оригинал орнаменти (нақш) мавжуд. Туяқушнинг ушбу орнаменти зич жойлашган ва тери юзида аниқ кўринадигани энг қимматбаҳо тери ҳисобланади.

Туяқуш териси бошқа терилардан жуда осонлик билан ишлов берилиши жиҳатидан ажралиб туради. Туяқуш терисидан тайёрланган буюм юмшоқлиги, жуда чидамлиги ва пишиқлиги билан ажралиб туради. Бузоқ терисидан тайёрланган буюм чидамлилиги, пишиқлиги туфайли 5 йил давомида ўз сифатини йўқотмай ишлатилса, ундан фарқли ўлароқ, туяқуш терисидан бўлган буюм тўлиқ 30 йилгача ўзининг юқори сифатини йўқотмайди.

10 ойдан 14 ойгача бўлган туяқушлар териси энг юқори сифатли ҳисобланади. Худди ана шу ёшда туяқушлар гавдаси катта ёшдаги туяқушлар гавдасига тенглашади ва барча органлари тўлиқ шаклланган бўлади, лекин шу билан бирга қариш жараёни ҳали бошланмаган бўлади. Шунинг учун тери юқори сифатли ва ёш ўтиши туфайли шикастланган, лат еган, бузилган ҳеч қандай жойлари бўлмайти.

Бундай туяқуш териси ҳажми 1,3 м² майдонни ташкил этади. Туяқушнинг ошланган (ишлов берилган) териси халқаро бозорда тахминан 450 АҚШ доллари туради. Сўзсиз туяқуш териси, илон ва тимсоҳ терилари билан бир қаторда энг қиммат турувчи терилар тоифасига киради.

Ўз-ўзидан тушунарлики, ушбу маҳсулотнинг асосий истеъмолчиси (харидори) қимматбаҳо тери аксессуарлари ишлаб чиқаришга қаратилган енгил саноат корхоналари ҳисобланади. Туяқуш терисига Франция, Италия, АҚШ ва Япония модельерлари томонидан катта қизиқиш билдирилади. Худди шу давлатлар туяқуш териларини катта ҳажмда импорт қилади.

■ I ТУЯҚУШ ПАТЛАРИ

Туяқуш патлари турли хил модали аксессуарлар ясашда кенг қўлланилади. Лекин туяқуш патларидан декоратив йўналишда фойдаланишдан ташқари амалда махсус вази-фада – ундан айрим механизмларни тозалаш учун махсус чўтка ишлаб чиқилади.

Ёввойи Африка туяқушларининг патлари Европа ва Шимолий Америкада етиштирилган туяқушлар патларидан фарқ қилади. Қуруқ иқлими ҳудудларда етиштирилган пат-лар энг сифатли ҳисобланади. Бундан ташқари, туяқуш пат-лари парранданинг қайси қисмида ўсганлигига қараб синф-ларга (класс) бўлинади.

Эркак туяқушлар қанотларининг биринчи қаторида оқ патлари мавжуд. Ҳар бир қанотида шундай патлардан 24 дона бўлади. Патларни оқлиги, узунлиги ва сифатига қа-раб турларга бўлинади.

Урғочи туяқушларда эркак туяқушларнинг оқ патларига ўхшаш патлари мавжуд. Бундай патлар “феминал” патлар деб номланади. Эркак туяқушлари патлари сингари урғочи туяқушларнинг феминал патлари ҳам турларга бўлинади. Фақат улар яна ранглар бўйича ҳам бўлинади: ёрқин, нор-мал, яримқорамтир ва қорамтир рангларга.

Кейинги синф – орнамент (нақш) патлар. Улар ҳам қа-нотда жойлашган бўлади, биринчи қаторида, фақат орна-мент патлари ҳаммаси бўлиб 4-5 дона бўлади. Ранги қора-оқ тусда бўлиб, фақат узунлиги бўйича классификацияланади.

Эркак туяқушнинг қанотидаги иккинчи ва учинчи қатор-ларда қора патлар мавжуд. Ушбу патлар ҳам узунлиги бўйича фарқланади ҳамда узун, ўрта ва калта деб номланади. Эркак

туяқушларни мана шу патларининг урғочилардаги аналогига кул рангда бўлади. Улар ҳам худди шундай классификацияланади.

Қанот тагида ва кўкрагини атрофида бир қатор ипакдек (шойидек) майин патлар бўлади. Ипак (шойи) патлар эркагида – қора, урғочисида – кулранг бўлади. Улар ҳам худди шундай сортларга ажратилади. Эркагининг дум патлари оқ ёки жигарранг (долчин ранг) бўлади, урғочисида оқиш ёки қорамтир рангда бўлади. Туяқуш дум патлари ранги бўйича синфларга бўлинади.

Туяқуш патларини тижорат нархларини қандай аниқласа бўлади? Бу ерда патларни узунлиги, қалинлиги, мустаҳкамлиги, ипакдек майинлиги, ёрқинлиги, эгилувчанлиги ҳисобга олинади. Бородоки энининг кенглиги, шу билан бирга унинг пат стволига қайси бурчакда жойлашганлиги катта аҳамиятга эга. Патлар формаси симметрияли, таги тўғри ва учи юмалоқланган бўлса, айниқса қимматбаҳо ҳисобланади.

Туяқуш патининг узунлиги 70 см ва энига кенглиги 30 см бўлса, сифатли ҳисобланади.

Тижорат режаси бўйича асосий кўрсаткичлардан нафақат юқорида кўрсатилган белгилари олинади, балки патларда турли дефектларнинг ва шикастланган жойларининг йўқлиги ҳам катта роль ўйнайди. Патлардаги чизиқ дефекти боқишдаги камчилик ёки ичидаги паразитлар мавжудлиги оқибати бўлиши мумкин. Ташқаридаги паразитлар ҳам патлар сифатига катта таъсир ўтказиши мумкин. Бундан ташқари патлар сифатига қушларни боқишдаги ноқулай шароитлари: ҳароратни кескин ўзгариши ва намликнинг кўтарилиши ва ҳоказолар таъсир қилиши мумкин.

ТУЯҚУШЧИЛИК МАҲСУЛОТЛАРИ

Озиқ-овқат ва текстил саноатидан ташқари туяқушчилик маҳсулотларига медицина, фармацевтика ва косметологияда ҳам талаб катта.

Тирик туяқушлардан медицина ва фармакологияда янги ишлаб чиқарилган препаратларни синов-текшириш ишларида фойдаланилади.

Асоси туяқуш ёғидан таркиб топган ва кучли терапевтик хусусиятига эга бўлган ажойиб косметик препаратлар ишлаб чиқилади. Бундай косметик воситаси терининг софлигини сақлайди ва қариш темпини камайтиради.

Хирургияда анчадан бери инсон пайлари жароҳатини даволашда туяқушлардан донор сифатида фойдаланилади. Ҳозирги вақтда инсон кўзини даволашда туяқуш кўзининг мугуз пардасини инсонга кўчириб ўтказиш бўйича илмий ишлар олиб борилмоқда. Туяқуш миясидан сўриб олинган суюқлик билан Альцгеймер касаллигини ва бошқа ақли заиф инсонларни даволашда фойдаланилмоқда. Балки яқин келажақда туяқуш инсониятга ОИТС ва саратонга (рак) қарши дори-дармон ишлаб чиқишда асосий омил бўлар, чунки туяқуш қонини шу соҳа бўйича ўрганишлар умидли натижаларга олиб келмоқда.

Фойдаланилган адабиётлар рўйхати:

1. Харчук Ю. Разведение и содержание страусов в родовой усадьбе. – М.: Феникс, 2010.
2. Рахмонов А.И. Разведение страусов. – М.: Аквариум, 2009
3. Туркия Республикаси “Озиқ-овқат қишлоқ хўжалиги вазирлиги” ҳамда “Denizbank” ҳамкорлигида тайёрланган “100 та китоб”дан иборат тўплами.
4. Кочиш И.И. Птицеводство. – М.: Колос, 2001.
5. Жумабоев Р. Туякуш боқинг ва даромад олинг. «Ўзбекистон паррандачилиги» илмий-оммабоп, ахборот-маърифий журнал. №04(15)/2018.
6. Мельников И. Разведение и выращивание страусов: Монография, 2012.
7. Киладзе А.Б. Африканский страус. Резервный потенциал в использовании продуктов страусоводства: Монография, 2011.
8. Москвина Т. Страус – птица русская: сборник, 2010.

This image shows a single sheet of white paper with horizontal green ruling lines. The lines are evenly spaced and run across the width of the page. There are no margins, text, or other markings on the paper.

[illegible]

This image shows a single sheet of white paper with horizontal green ruling lines. The lines are evenly spaced and run across the width of the page. There are no margins, text, or other markings on the paper.

46.8
Т 94

Туяқушларни парваришlash [Матн] : илмий нашр /
«Агробанк» АТБ.-Тошкент: "ТАСВИР" нашриёт уйи, 2021. - 80 б.

ISBN 978-9943-7174-4-2

УЎК 63:568.221

КБК 46.8

Лойиҳа ғояси муаллифи ва ташкилотчиси
“Агробанк” АТБ

100 китоб тўплами

ТУЯҚУШЛАРНИ ПАРВАРИШЛАШ

88-китоб

***Нашриёт уйи “Тасвир”
Тошкент – 2021***

Таржимонлар:

Тошкент давлат шарқшунослик университети
“Таржима ва тил маркази” таржимонлар гуруҳи

Муҳаррир-мусахҳих:

М. Тошпўлатов

Компьютерда тайёрловчилар:

З.Б. Хошимов, Н.С. Сайидахмадов

Дизайнер:

С. Дониёров

Нашриёт тасдиқномаси: № 7404, 02.02.2021
Босишга 16.04.2021 да рухсат этилди. Бичими 60x84 ¹/₁₆
Fira Sans гарнитураси. Офсет босма усулида чоп этилди.
Адади 830 нусха. Буюртма рақами: 1112

“Colorpack” МЧЖ босмахонасида чоп этилди.
Тошкент шаҳар, Янги шаҳар кўчаси, 1А.